

清
·
史
稿



清史稿

列傳九十八

哈攀龍

子國典

任舉

冶大雄

馬良柱

本進忠

劉順

哈攀龍直隸河間人其先出回部乾隆二年一甲一名武進士授頭等侍衛以副將發福建除興化城守副將遷總兵歷河南南陽福建海壇漳州諸鎮以母喪去官十三年高宗東巡攀龍迎鑾命往金川隸總督張廣泗軍署松潘鎮總兵出美諾溝取撒臥山大松林噶達諸寨分兵出馬溝右梁察形勢得其險要搜截松林賊蔽松設卡毀其二徑左梁山溝礮斃賊數十進克渴足寨焚礮寨四水城一殺賊二十餘尋與署重慶鎮總兵任舉合兵攻色爾力石城舉沒於陣攀龍入林殪賊三十餘奪舉尸回復偕都統班第署重慶鎮總兵段起賢侍衛富成分道夜襲色爾力焚木卡三殺賊五十餘進破石梁雙溝諸壘經略訥親總督張廣泗劾攀龍攻色爾力不能下兵部議左遷上責攀龍自陳攀龍言

屢克卡殺賊報廣泗廣泗不以入告會訥親廣泗皆得罪去上知攀龍枉命罷議尋從經略大學士傅恒夜攻色爾力先登拔石卡殪賊數十四年金川事定命著固原提督十六年移湖廣提督陳整飭弁兵諸事上嘉勉之尋命真除復移貴州提督入陛見病留京師卒子國興乾隆十七年武進士授三等侍衛出爲雲南督標右營遊擊遷東川營參將緬甸頭人召散據孟良爲亂總督楊應琚檄國興佐軍戰楞木進克猛卯督戰被鎗創右輔及臂應琚以聞賜孔雀翎尋著騰越營副將時副將趙宏榜以偏師深入與緬人戰於新街師敗績國興師至蠻莫訶新街無備督兵潛入緬人乃引退從將軍明瑞進克木邦戰於蠻莫大破之復偕侍衛莽克察擊斬守隘賊六十餘擢楚姚鎮總兵入陛見命在乾清門行走賚銀幣還軍移普洱鎮總兵遷貴州提督經略傅恒議用水師令國興赴銅壁關外野人山督造船移雲南提督加太子少保船成從傅恒出猛拱孟養南豐猛烈猛壩次老官屯緬人水陸備甚固攻之不時下頭人諾爾塔以其酋憎駁命遣使得魯蘊詣軍乞解兵傅恒令國興出見曉以利害令具

約十年一貢毋更擾邊歸所掠內地人緬人誓奉約時傅恒方病將軍阿桂召從征諸大臣議皆言許之便遂與定約解兵旣而貢弗至總督彰寶遣都司蘇爾相諭意留不遣揚言國興許以木邦猛拱蠻莫二土司予緬人請如議彰寶劾國興與緬人議具約不以實上召國興至京師詰國興國興自陳未嘗有此議上責國興遷就畢事奪太子少保左授貴州古州鎮總兵移雲南臨元鎮後二年得魯蘊復至老官屯請如前誓三事時師征金川上命國興從將軍溫福進討三十七年遷西安提督命盡護陝西甘肅從征諸軍尋令偕總兵董天弼自曾頭溝取底木達布朗郭宗溫福以國興能軍令自策卜丹徑取美洛當一面國興自阿喀木雅山溝紆道徑瑪爾迪克山寨察策卜丹地勢林深徑狹不宜於行師乃將二千人佐海蘭察攻瑪爾迪克溫福再疏聞上金川賊千餘屯貢噶山左謀劫糧國興馳擊賊敗匿師還經瑪爾迪克賊自林中出復擊敗之上賚荷包四進攻貢噶山設伏斬賊百餘搜奪碉卡九月金川酋索諾木使詣國興請獻鄂克什地以降國興令併割南北兩山美美卡木蘭壩及瑪爾迪

克越日賊盡撤諸柵國興以兵入鄂克什舊寨賊退守路頂宗十月使歸墨壘
溝師敗時所掠外委臧儒且言嘗勸僧格桑同降溫福以聞上令國興檄諭索
諾木聲其罪時國興及海蘭察將五千人屯貢噶山謀攻策卜丹阻冰雪未進
上命還師攻路頂宗路頂宗山麓有巨溝溝源出南山海蘭察紆道出山後侍
衛額森額自小徑爲應國興前越溝攻碉師繼進遂克路頂宗破卡五十餘碉
三百餘俘獲甚衆復自喀木色爾北山攻穆拉斯郭大寨進據兜烏山巔與總
兵馬彪軍合奪附近碉卡克額爾莽木柵復將千人渡水自南山鄂爾齊仰攻
克諸寨與大軍會進攻明郭宗別以兵襲擊公雅山克木爾古魯寨並奪據嘉
巴山麓廷議既定小金川分命將帥三道進討金川上曰國興雖綠營漢員熟
軍事又嘗爲乾清門侍衛與滿洲大臣無異授參贊大臣佐副將軍豐昇額是
月克明郭宗焚念經樓整兵進取日果爾烏山麓攻美諾上嘉國興功官其子
文虎守備攻克布朗郭宗僧格桑遁金川我軍直抵底木達僧格桑父策旺出
降小金川平國興卒於軍賜白金千存恤其家加贈太子太保諡壯武祀昭忠

祠圖形紫光閣文虎授陝西提標右營守備從軍攻木果木陣沒從祀昭忠祠
復官次子文彪千總

任舉山西大同人雍正二年武進士以守備發陝西累遷固原提督左營遊擊
署城守營參將乾隆十一年二月固原兵變夜攻提督許仕盛毀轅門將入舉
聞亂單騎詣鼓樓鳴角招營兵未變者纔五十人部勒使成列變兵懼退掠市
廛舉追及手刃五十餘人禽四十餘人變兵出城南門還攻東西二門舉守東
門右營遊擊鐵保守西門禦戰變兵潰事定總督慶復以聞擢中軍參將十二
年命征金川隸總督張廣泗軍尋授西鳳協副將舉至軍與總兵許應虎副將
高宗瑾參將賈國良攻色底賊礮擊以礮二百餘發礮一角圮垣鑿孔發礮密
如鱗比舉度我軍礮小不能下將移軍退守賊出戰再設伏敗之十三年上諭
謂在軍諸將犷於瞻對之役庸懦欺蒙已成夙習今別用舉等皆未從征瞻對
無所掣肘宜鼓勵勇往廣泗亦奏在川鎮將忠誠勇幹無出舉右者令率漢土
兵三千取道攻昔嶺尋又奏令署重慶鎮總兵舉與參將王愷自牛廠至素可

尼山時五月遇大雪闢道以行經撒烏山至昔嶺山梁山北曰木岡孤峯當道賊置城卡守隘舉督兵攻卡憑高發礮洞其垣令土兵緣溝潛進燬賊礮師循出山腰克賊卡遂陟中峯以千人駐守進攻木岡時總兵哈攀龍師至馬溝右梁阻松林不得進廣泗令自納喇溝出昔嶺右與舉合攻木岡賊所置城卡力戰未卽下舉察昔嶺左有道通卡撤中經得思東木達溝賊皆置礮焉總兵冶大雄方自卡撤進舉與合軍焚木達溝諸礮圍得思東斷其汲道督兵挾斧斫賊賊墮巖遁得大小礮三進攻色爾力石城分兵爲三道舉督兵直攻石城攀龍出其右副將唐開中及國良出其左越溝度林攻賊所置木城國良戰死六月己巳舉與攀龍開中合攻石城城堅甚我師方力攻賊三百餘自西南林內出舉督兵與戰被創戰益力槍復中要害遂卒攀龍入林殺賊以其尸還時上方命舉眞除經略大學士訥親以舉死事聞上閱疏爲泣下並諭舉忠憤激發甘死如飴而朕以小醜跳梁用良臣於危地思之深惻命視提督例賜卹加都督同知諡勇烈祀昭忠祠官其子承恩都司承緒千總承恩喪終入謝上以尙

幼命傳諭其母善教之二十四年授三等侍衛累遷福建陸路提督五十二年臺灣林爽文爲亂承恩請往討之師無功逮詣京師罪當死上寬之五十三年救出獄五十五年復授巡捕營參將遷副將卒承緒官巡捕營遊擊市中火赴救被創卒上之赦承恩謂其未有子承緒又死勤事不可使舉無嗣也

冶大雄四川成都人康熙季年入伍從征西藏克裏塘巴塘降結敦落籠宗說板多打籠宗諸寨獲爲亂喇嘛五雍正初從軍出松潘黃勝關剿撫熱當十二部落攻郭隆寺攻嶺三破寨十五追斬康布喇嘛於西海又從征卓子山碁子山戮頭人追剿羅卜藏丹津擒丹津璋台吉川陝總督岳鍾琪疏薦引見特授藍翎侍衛累遷陝西莊浪營參將加副將銜賜孔雀翎命赴巴里坤軍檄署川陝督標中軍副將準噶爾犯克什圖峨崙磯諸卡倫大雄偕總兵樊廷以二千人當賊二萬轉戰七晝夜拔守卡倫兵以出與總兵張元佐等師會力戰殺賊賜拜他喇布勒哈番世職賚白金五千尋授直隸山永協副將命署湖北彝陵鎮總兵上言彝陵距省千餘里兵饑歲以四季支給請改夏秋冬春二次彙支

下督撫議行尋調署山西大同鎮總兵與前任總兵李如栢互劾均奪職乾隆
元年以副將發湖廣尋授衡州協副將城綏苗獠爲亂大雄駐長安堡焚賊寨
截其渠餘相率就撫擢鎮筸鎮總兵總督孫嘉淦劾大雄貪縱奪職湖南巡撫
蔣溥言讞無貪縱迹引見復授雲南昭通鎮總兵叙剿苗功加都督僉事銜十
三年從征金川至卡撒統雲南貴州諸軍進攻色底光多諸寨引兵出昔嶺中
峯之西與署總兵哈攀龍任舉師會克大小碉十石城一墮碉百三十同攻克
昔嶺溝底石城水卡經略大學士傅恒奏大雄歷經戰陣令總理營壘措置妥
協賜孔雀翎金川頭人莎羅奔等乞降師還授雲南提督加左都督銜入覲官
其子繼鈞藍翎侍衛命送大雄上官疏言西藏喀拉烏蘇諸地與準噶爾連界
盜竊紛擾是其故習今藏北鄙卽我邊地防邊自可弭盜請駐藏大臣仍設重
兵循大道置臺站以資防守上嘉其留心繼鈞至常德迎家中途假回民金大
雄以聞上以大雄知事不可揜乃始奏劾左授哈密總兵命署安西提督赴巴
里坤驗馬駝疏報四千餘會總督方觀承核參將鍾世傑等至巴里坤領馬千

九百餘途中馬多死論罪上以大雄疏不實下部議總督黃廷桂復劾大雄命奪官逮京師治罪二十一年四月行至西安卒三十二年上以綠營世職不得世襲罔替下兵部察諸將有功者俟襲次畢賜恩騎尉世襲罔替大雄與焉

馬良柱甘肅張掖人其先本回部康熙季年從軍征吐魯蕃雍正初將軍阿爾那檄赴插漢麥里干討賊皆有功復從安西鎮總兵孫繼宗攻羅卜藏丹津降台吉三十三戰於哈馬兒打布罕噶斯禽其渠授藍翎侍衛賜白金百遷三等侍衛外授四川提標遊擊賜貂皮數珠命將兵屯西藏旋以兵擾民左降聽四川巡撫提督調遣八年瞻對土司爲亂提督黃廷桂檄良柱討之賊堅守石碉督兵仰攻槍殪所乘馬易馬進再殪乃步行督戰碉上投石如雨傷面搏賊益奮火其碉並焚擦馬擦牙諸寨殲賊無算側冷邦諸頭人皆降復授松潘鎮左營遊擊三遷夔州協副將乾隆十年師復征瞻對破直達松多諸寨奪碉七十餘進攻下密左山梁獲頭人噶籠丹坪再進克下密等百餘寨獲頭人塔巴四交渡了魯河遂破瞻對焚其寨其渠姜錯太死於火十二年大金川酋莎羅奔

改革什咱士司並掠明正土司所屬魯密章谷諸地巡撫紀山移良柱威茂協副將督兵防禦莎羅奔糾小金川土司澤旺侵沃日各寨都司馬光祖赴援賊大至光祖困於熱籠良柱率輕騎馳救敗賊巴納山進克石卡二百二十三光祖等出應賊潰圍解澤旺降並還所侵沃日三寨詔嘉其奮勇遷重慶鎮總兵再進復孫克宗官寨攻江卡戰屢勝克太小碉寨百餘降二十餘寨進克丹噶山分兵焚撒籠等七寨噶固等寨先後降賊守石達大碉良柱冒雨進數十戰賊乘夜來撲營設伏殲焉馬邦頭人思錯已降總兵許應虎馭之不以道復叛圍應虎於的交良柱馳救賊退入戎布寨攻之未下旋復犯馬邦副將張興被圍良柱請移戎布師赴援總督張廣泗不許興陷於賊侵噶固守兵叛附賊奪卡倫七廣泗令良柱往攻力戰賊未卻值大雪二十餘日糧匱煮鎧弩以食力不支廣泗檄退師倉卒移營礮械爲賊得廣泗劾之命逮詣京師良柱陳糧絕狀上特原之命在香山教禁軍雲梯親臨觀之良柱起舞鞭稱旨賜大緞荷包命仍赴金川軍以副將參將等官酌量委用尋授秦寧協副將大學士傅恒視

師檄良柱攻昔嶺克之莎羅奔請降良柱以十餘騎入其營宣諭授建昌鎮總兵賜孔雀翎母憂去官召入京師仍令教禁軍習雲梯服閱授松潘鎮總兵雜谷土司蒼旺爲亂偕提督岳鍾琪討平之尋請老改籍四川華陽卒年八十一良柱額隆然大目虬髯邊人畏之號爲獅子頭善戰臨陣手鐵鞭一馬上旋轉如飛其攻噶固廣泗不爲策應饒又不時至上知廣泗忌其成功故特輕其罰云子應詔官直隸河間副將孫瑜自有傳

本進忠甘肅西甯人初入伍冒姓名曰張元吉尋請復姓名雍正中從揚武將軍張廣泗援吐魯番屯魯克沁準噶爾來侵邀擊禽賊七復追敗之哈喇和卓乾隆十三年檄赴金川從征囊得山梁攻碉先登奪矛中石傷從攻普沾擲火彈入碉焚碉十三奪木城進戰於樂利噶爾隄克殪賊攻碉右股中槍傷錄功擢四川威茂協右營都司引見賜大緞雜谷土司蒼旺爲亂提督岳鍾琪檄進忠討之奪銅礮一斬馘數十生禽二十五降茶堡番民二千餘自角木角溝入雜谷獲蒼旺累擢永甯協副將三十年從將軍明瑞征緬甸進攻蠻結克木卡

清史稿
十六嬉賊三傷額明日仍裹創出戰事聞賜孔雀翎號法式善巴圖魯擢雲南
臨元鎮總兵明瑞令將五千人屯龍陵關備調遣召詣熱河行在入見命乾清
門行走賜貂皮銀幣令還軍旋移普洱鎮總兵擢雲南提督卒加太子太保諡
勤毅

劉順順天人雍正五年武進士授藍翎侍衛以守備發陝西累遷至金塔協副
將乾隆十三年令將千五百人赴金川偕副將高雄自甲索攻囊得道松林賊
百餘出戰擊之遁燬賊碉從大軍自卡撒左山梁進諸碉以次皆下惟普瞻雙
單二碉守甚堅日暮將收兵順潛率所部逼單碉縱火攻之賊潰並奪雙碉師
繼進遂克色底普瞻西有山曰阿利賊碉林立順冒雨奮攻奪山梁木卡破碉
發礮殪賊數十復破大碉一石卡四經略訥親屢奏順奮勇金川平擢貴州威
寧鎮總兵上以順熟邊情移甘肅西寧鎮總兵入見賜孔雀翎擢安西提督病
乞罷卒加太子太保諡壯靖

論曰初征金川攀龍舉大雄皆以勇略著舉尤驍桀爲軍鋒訥親張廣泗督戰

急鼓銳攻堅遂以身徇傷已良柱善戰又以廣泗牽制不能盡其材進忠順力戰破堅礮亦攀龍輩之亞也

清史稿

列傳九十九

傅清

拉布敦

班第

子巴祿

鄂容安

納穆札爾

三泰

傅清富察氏滿洲鑲黃旗人李榮保次子傅恒弟也雍正間授侍衛乾隆初累遷至直隸天津鎮總兵康熙中定西藏留兵鎮撫以大臣駐藏辦事爲員二嗣省其一是時駐藏副都統索拜當代命傅清以副都統往十一年疏言西藏處徼外西北界準噶爾北通青海爲四川西南外郭自雍正十二年設塘汛不特傳送官文書且以聯絡聲氣上年索拜以節費議撤汛使藏人任郵遞謂之番塘未幾輒被盜今準噶爾當入藏熬茶番塘恐滋誤請自打箭鑪至藏復置塘汛酌衝僻遠近當得兵千人以內議如所請十二年西藏郡王頗羅鼐卒頗羅鼐愛其次子珠爾默特那木扎勒請以爲嗣遂襲爵爲郡王上諭傅清曰頗羅鼐更事多黽勉事中國珠爾默特那木扎勒幼傅清宜留意如珠爾默特那木

扎勒思慮所未至當爲指示傅清疏言頗羅廩在時長子公珠爾默特策布登
出駐阿里克夏當令珠爾默特那木扎勒帥師出駐騰格里諾爾喀喇烏蘇諸
處今仍遣珠爾默特策布登駐阿里克夏令別遣宰桑駐騰格里諾爾喀喇烏
蘇諸處又以準噶爾入藏熬茶請增兵分路防護上命與珠爾默特那木扎勒
商權毋涉張皇十三年命以提督拉布敦代傅清還復授天津鎮總兵遷古北
口固原提督珠爾默特那木扎勒請撤留藏兵上從之旋以副都統紀山代拉
布敦十四年紀山疏言珠爾默特那木扎勒與達賴喇嘛有隙請移達賴喇嘛
置秦寧上知珠爾默特那木扎勒乖戾且爲亂命駐藏大臣復舊置二員予傅
清都統銜自固原復往紀山復疏謂珠爾默特那木扎勒言其兄珠爾默特策
布登將舉兵相攻上命傅清途中詞虛實傅清疏言珠爾默特策布登未嘗構
兵特殊爾默特那木札勒妄言藉以奪其兄分地臣至藏卽將珠爾默特那木
扎勒懲治是時上已遣侍郎拉布敦代紀山因諭傅清珠爾默特那木扎勒乖
戾且爲亂令熟計密奏十五年傅清與拉布敦先後至藏珠爾默特那木扎勒

迫其兄珠爾默特策布登至死遂逐其子遣使通準噶爾叛益有迹上命副都統班第赴西藏與傅清拉布敦密謀取進止仍詔傅清拉布敦毋輕發並密諭四川總督策楞勒兵爲備珠爾默特那木扎勒謀愈急絕塘汛軍書不得達傅清與拉布敦未得上詔計以爲珠爾默特那木扎勒且叛徒爲所屠亂旣成吾軍不得卽進是棄兩藏也不如先發雖亦死亂乃易定十月壬午召珠爾默特那木扎勒至通司岡駐藏大臣署言有詔使登樓預去其梯若將宣詔珠爾默特那木扎勒方拜跪傅清自後揮刀斷其首於是其黨羅卜藏札什始率衆圍樓數重發鎗礮縱火傅清中三創度不免自剄死拉布敦死樓下主事策塔爾參將黃元龍皆自殺通判常明中矢石死從死者千總二兵四十九商民七十

七事聞上軫悼宣示始末謂其揆幾審勢決計定謀心苦而功大傅清追封一等伯諡襄烈旋命立祠通司岡喪還上臨奠其子孫以一等子世襲賜白金萬班第至藏戮羅卜藏札什等疏陳珠爾默特那木扎勒自立名號通款準噶爾稱策旺多爾濟那木扎勒爲汗請其發兵至札達克爲聲援上復降詔褒傅清

拉布敦建祠京師命曰雙忠子明仁以侍衛襲子爵從征金川卒於軍

拉布敦棟鄂氏滿洲鑲紅旗人其先對齊巴顏於太祖時率所部來歸語見阿蘭珠朗格諸傳父錫勒達事聖祖自贊禮郎累遷吏部尙書出署川陝總督還京師以鎮箠苗爲亂命偕副都統圖斯海徐九如帥師討之降三百一寨勦十五寨錫勒達與荊州副都統珠滿湖廣提都俞益謨所戡定者天星龍椒洞排六梁等三寨亂定與總督于成龍巡撫趙申喬議立營汛增設官吏爲撫綏復還京師卒拉布敦其第六子也生有力能彎十力弓左右射工詩文習外國語言康熙間襲叔祖勒爾圖三等阿達哈哈番世職雍正朝從傅爾丹討準噶爾戰於和通呼爾哈訥爾又從策凌討準噶爾戰於額爾德尼昭皆有所斬馘授世管佐領上命軍中舉驍勇之士拉布敦與焉賜孔雀翎乾隆初累遷正紅旗滿洲副都統八年復討準噶爾授參贊大臣出北路九年授定邊左副將軍其冬疏言厄爾特宰桑額勒慎等內牧布爾吉推河烏梁海得木齊札木禪內牧布延圖河源布爾吉推河在阿爾台山梁外布延圖河源在阿爾台山梁內距

卞倫不遠已割坐卡特衛等嚴防十年冬疏言烏梁海得木齊烏爾巴齊等避雪內牧黃加書魯克距卡倫不遠託爾和烏蘭布延圖哈瑪爾沙海諸卡倫外皆有準噶爾人蹤跡仍割坐卡特衛等嚴防尋召還京師授正白旗滿洲副都統復出署古北口提督十三年駐藏副都統傅清當代命拉布敦往十四年召還以紀山代授工部侍郎未終歲上徵紀山還復命赴藏十五年授左都御史尋與傅清謀誅珠爾默特那木扎勒其黨羅卜藏扎什圍樓拉布敦挾刃躍下樓擊殺數十人自剖其腹死上聞贈爵賜金立祠如傅清命以拉布敦之族升隸正黃旗諡壯果子隆保以侍衛襲子爵誤班奪官爵除

班第博爾濟吉特氏蒙古鑲黃旗人康熙間自官學生授內閣中書五遷雍正初至內閣學士四川雲南徼外與西藏定界命偕副都統鄂齊如西藏宣諭遷理藩院侍郎坐事左遷在內閣學士上行走十一年命在軍機處行走乾隆三年授兵部侍郎外擢湖廣總督勦鎮寧永綏亂苗兩閱月而畢上嘉焉五年以憂還京師六年命仍在軍機處行走授兵部尙書十三年師征金川授內大臣

出督軍饗加太子少保尋按四川巡撫紀山加徵累民狀命卽署巡撫時訥親張廣泗師久無功上諮班第但言廣泗罪狀語不及訥親上諭曰班第雖職饗然爲本兵軍機大臣軍事及將弁功罪皆職掌所在不得以督饗一切置不問左遷兵部侍郎十四年予副都統銜赴青海辦事西藏郡王珠爾默特那木扎勒有叛逆駐藏辦事大臣傅清拉布敦疏聞上移班第代拉布敦未至珠爾默特那木扎勒謀益急傅清拉布敦召至廨誅之其徒卓呢羅卜藏扎什等遂叛傅清拉布敦死之公班第達執卓呢羅卜藏扎什等班第至按訊又得其黨德什奈等凡二十七人悉誅之上以藏酋授王爵名位過重命班第達以公爵管格隆事令班第宣諭班第又疏陳珠爾默特那木扎勒與準噶爾通書謀叛狀上命誅珠爾默特那木扎勒妻子四川總督策楞等以師至會議西藏善後諸事西藏大定十六年授都統銜十七年還京師仍在軍機處行走授正紅旗漢軍都統出署兩廣總督十九年師征準噶爾復授兵部尙書著定邊左副將軍出北路準噶爾內亂輝特台吉阿睦爾撒納來降詔以明歲進兵諭班第籌畫

班第以軍中駝馬牛羊宜牧地得扎布堪呢主諸處冬令暖富水草令喀爾喀親王額琳沁多爾濟等往督牧遣兵擒烏梁海宰桑車根赤倫等收其衆數千戶復令參贊大臣薩喇爾將兵擒準噶爾宰桑庫克新瑪木特通瑪木特收其衆得牲畜無算上獎班第奮勇果斷予子爵世授正黃旗領侍衛內大臣賜白金千十二月授定北將軍召來京示方略二十年正月大舉討準噶爾班第出北路阿睦爾撒納授定邊左副將軍爲副永常以定西將軍出西路薩喇爾授定邊右副將軍爲副班第與阿睦爾撒納等議以二月出師阿睦爾撒納將六千人先行班第將二千人繼其後班第至齊齊克淖爾以馬不給令千五百人先留五百人待馬再進至喇托輝與阿睦爾撒納軍合上以阿睦爾撒納爲準噶爾人所知令其前行易招撫戒班第仍令阿睦爾撒納先行母合軍班第至額爾得里克復令阿睦爾撒納先行四月師至博羅塔拉得達瓦齊所遣徵兵使者知伊犁無備班第謀約西路軍銳進五月遂克伊犁達瓦齊以萬人保格登山侍衛阿玉錫以二十餘騎擊之驚走上獎班第功封一等誠勇公賜寶石

頂四團龍補服金黃纒朝珠班第以伊犁厄魯特生計甚艱不足供大兵六月
疏請留察哈爾兵三百喀爾喀兵二百移駐伊犁河北尼楚袞治事諸軍次第
遣還是月獲達瓦齊獻俘京師軍初出上察阿睦爾撒納有異志令班第嚴約
束及伊犁既定上令和碩特四部部置汗將以阿睦爾撒納爲輝特汗阿睦爾
撒納覬總統四部意不慊置副將軍印不用用故準噶爾台吉噶爾丹策凌菊
形小印檄諸部諱其降言以中國兵定亂叛逆漸著上召阿睦爾撒納以九月
至熱河行在行飲至禮與他部汗同受封參贊大臣色布騰巴爾珠爾率遣還
諸軍以歸阿睦爾撒納乞代奏冀總統四部期七月俟命色布騰巴爾珠爾歸
不敢聞以班第越阿睦爾撒納詣熱河令參贊大臣額林沁多爾濟與俱阿睦
爾撒納快快就道而上念阿睦爾撒納終且叛諭班第宜乘其未發討之母濡
忍貽後患諭至阿睦爾撒納已行上又命鄂容安等擒治八月阿睦爾撒納行
至烏隴古解副將軍印還額林沁多爾濟走額爾齊斯遂叛伊犁道梗阿睦爾
撒納之黨克什木巴朗敦克多曼集烏克圖等作亂班第與鄂容安以五百人

拒戰自固勒扎赴空格斯轉戰至烏蘭庫圖賊大至圍合班第拔劍自剄鄂容安同殉上初聞班第等陷賊令參贊大臣策楞自巴里坤間使傳諭毋以身殉策楞聞訛傳班第等自賊中出以聞上解所佩荷包爲賜旣聞班第等死事狀降詔謂班第鄂容安見危授命固爲可憫然於事無補非傳清拉布敦爲國除兇者比二十一年師復定伊犁喪還上親臨奠並令執克什木巴朗等馘耳以祭又以薩喇爾同陷賊不能死令監往旁視尋視班第義烈仍如傳清拉布敦故事京師建祠亦曰雙忠旋復命圖形紫光閣子巴祿初以察哈爾總管從軍襲一等誠勇公授鑲紅旗蒙古都統從定伊犁師討霍集占授參贊大臣援將軍兆惠有功命駐軍和闐戰伊西洱庫爾淖爾屢敗霍集占師還加雲騎尉世職圖形紫光閣爲後五十功臣首出爲涼州綏遠城將軍察哈爾都統卒

鄂容安字休如西林覺羅氏滿洲鑲藍旗人大學士鄂爾泰長子雍正十一年進士改庶吉士世宗命充軍機處章京乾隆元年授編修南書房行走再遷五年授詹事府詹事鄂爾泰承旨固辭上曰鄂容安與張廷玉子若霽皇考命在

軍機處行走本欲造就成材朕茲擢用鄂爾泰母以己意辭是時直軍機處大臣與章京皆曰行走無異辭也尋又命上書房行走七年以與聞左副都御史仲永檀密奏留中事奪職語在永檀傳八年命仍在上書房行走授國子監祭酒十年襲三等伯爵後五年加號襄勤十二年授兵部侍郎十三年出爲河南巡撫賜孔雀翎河南境伏牛山界陝西湖北二省袤延八百餘里鄂容安行部入山親勘又以界上諸關通大道易藏姦宄飭行保甲入奏上嘉焉衛輝參將阮玉堂督操鞭所部兵兵譁鄂容安疏請先治譁兵罪然後罷玉堂母令兵驕亦當上指鄂容安又令糴補諸府州縣常平倉穀都二十九萬石有奇浚治開封歸德陳州三府幹枝諸水以慎蓄洩廣灌漑上獎其留心本務十五年上巡幸河南鄂容安疏言河南士民樂輸銀五十八萬七千有奇上曰朕巡幸方岳從不以絲毫累民曾何藉於輸將且省方問俗勤恤民隱尙慮助之弗周豈容供用轉資於下鄂容安此奏失政體其以輸銀還之士民鄂容安疏請罪又言士民輸銀出本願還之恐不免胥吏中飽仍請允其奏上意終不懌還幸保定

鄂容安入見不引謝上詰責令痛自改悔不得有絲毫糜費粉飾爲補過之地十六年移山東巡撫濟南被水米貴鄂容安請用乾隆十三年例暫弛海禁招商往奉天糴運旋與東河總督顧琮規塞張秋挂劍臺河決培築運河隄自臺兒莊至德州千有餘里循隄建堡房塞太行隄涵洞以紓甯陽等縣水患十七年疏陳山東州縣吏交代庫銀倉穀多有虧缺下各府考覈又移江西巡撫十八年授兩江總督十九年疏言江南地廣事繁胥役弊滋甚淮安等府藉賑爲弊蘇州等府藉漕爲弊徐州府藉應徭爲弊當嚴覈懲治令各屬胥吏遵經制原額禁僞冒及額外無名白役是年考績加太子少傅上將用兵準噶爾取達瓦齊以鄂容安年力方盛勇壯曉暢召授參贊大臣二十年永常以定西將軍出西路薩喇爾以定邊右副將軍爲副鄂容安實從諭曰漢西域塞外地甚廣唐初都護開府擴地及西北今遺趾久湮鄂容安在軍凡準噶爾所屬及回部諸地有與漢唐史傳相合可援據者並漢唐所未至處當一一諮詢記載旋偕薩喇爾入告途中撫降諸部落並檄諭達瓦齊賚荷包鼻煙壺及師定伊犁是

胡中藻以賦詩誅上誅中藻爲鄂爾泰門生鄂爾泰從子鄂昌與唱和連坐上責鄂容安不爲陳奏行賞獨不及命與班第駐守伊犁阿睦爾撒納叛迹漸著鄂容安入告上令與薩喇爾率師至塔爾巴哈臺相機捕治阿睦爾撒納入覲中途遂叛伊犁諸宰桑應之鄂容安與班第力戰不支相顧曰今日徒死於事無濟負上付託矣班第自剄鄂容安腕弱不能下命其僕剗刃於腹乃死故事大臣予諡者內閣擬二諡請上裁以翰林起家者例諡文至是擬文剛文烈上抹二文字諡剛烈圖形紫光閣上親爲贊有曰用違其才實予之失蓋重惜之也以次子鄂津襲爵官至伊犁領隊大臣坐事奪官以鄂容安長子鄂岳襲爵納穆扎爾圖伯特氏蒙古正白旗人都統拉錫子納穆扎爾自閒散授藍翎侍衛累遷工部侍郎鑲藍旗滿洲副都統乾隆十五年西藏珠爾默特那木扎勒之亂既定命偕班第駐西藏議增設噶卜倫皆予扎薩克銜自喀喇烏蘇至庫車增臺八設兵準噶爾通藏凡阿里那克桑騰格里淖爾阿哈雅克四路各於隘口設卡倫又有勒底雅路爲準噶爾犯藏時間道亦駐兵防守迭疏陳請皆

如議行十九年杜爾伯特諸部來降命赴北路料理游牧偕喀爾喀親王得親
扎布規畫安置輝特和碩特十三旗於固爾班舒魯克杜爾伯特十旗於鄂爾
海西喇烏蘇分界駐牧設卡倫防範納穆扎爾撫降人頗至當夏慮赴京領饌
不耐炎暑請遣使轉饌至張家口散給及秋杜爾伯特諸旗遇霜雪損畜入告
予米五百石賑撫輝特和碩特諸旗生計緝奏濟以糧畜阿睦爾撒納叛命駐
烏里雅蘇臺旋移戶部侍郎二十一年和托輝特台吉青滾雜卜亦叛納穆扎
爾慮喀爾喀諸部爲所動傳檄諭以利害上嘉之授參贊大臣從將軍成袞扎
布率索倫兵追捕青滾雜卜十一月師至杭哈獎噶斯已近俄羅斯境捕得青
滾雜卜檻送京師上獎納穆扎爾勇往封一等伯世襲號曰勤襄二十二年授
工部尙書正紅旗滿洲都統命駐科布多旋又命移駐布延圖十月署定邊左
副將軍二十三年議烏梁海降人酋曰察達克所屬鄂拓克置得木齊收楞額
治庶事請以得木齊改佐領收楞額改驍騎校歲貢貂皮送烏里雅蘇臺賚以
緞布疏入如所議師討霍集占復授參贊大臣出西路尋授靖逆將軍會雅爾

哈善攻庫車及兆惠代雅爾哈善將師自阿克蘇進逼葉爾羌至喀喇烏蘇爲
霍集占所圍納穆扎爾及參贊大臣三泰先奉命帥師濟兆惠軍兆惠遣副都
統愛隆阿侍衛奎瑪岱來迎納穆扎爾道遣愛隆阿先還而與三泰奎瑪岱將
二百騎夜進遇賊三千餘圍數重力戰矢盡遂沒於陳上聞追封三等義烈公
諡武毅祀昭忠祠回部平圖形紫光閣子保甯自有傳保泰自拜唐阿累遷察
哈爾都統與雅滿泰同爲駐藏大臣廓爾喀侵藏保泰坐請達賴喇嘛禪額
爾德尼避兵又匿廓爾喀未構兵前表貢方物及遣使有所請不以入奏上改
其名曰俘習渾與雅滿泰同奪職荷校先後予杖者四藏事定戍俘習渾黑龍
江赦還雅滿泰復授侍衛

三泰石氏漢軍正白旗人都統石文炳孫也父觀音保官至都統三泰自藍翎
侍衛累遷正紅旗漢軍副都統吏部侍郎乾隆二十三年命軍機處行走調戶
部侍郎命以參贊大臣行走從納穆扎爾出西路七月命納穆扎爾三泰率健
銳營及索倫察哈爾兵應兆惠夜進期以黎明至兆惠軍遇賊衆寡勢不敵力

戰三秦墜馬徒步擊賊中創死三等待衛彰武藍翎侍衛班泰管站四品花翎西拉布護軍校委署章京齊旺扎布及兆惠所遣迎師三等待衛奎瑪岱皆死上聞追封三等子諡果勇石廷柱之裔本以散秩大臣世襲至是別授其兄祥泰散秩大臣回部平圖形紫光閣上追悼納穆扎爾三秦死事爲賦雙義詩以傳清拉布敦殉西藏班第鄂容安死伊犁相擬謂此六人者事異心同皆與國休戚之蓋臣也子佛柱襲子爵散秩大臣官阿克蘇領隊大臣

論曰高宗朝徼外諸叛霍集占最桀驁耐戰方其困兆惠保葉爾羌非師武臣力幾不能克阿睦爾撒納旣叛師未接輒遠竄非霍集占比也珠爾默特那木扎爾欲背中國乃汗準噶爾尤愚妄殆不足數六臣所遇異故其效亦殊大旣加罪人斯得咸廩廩稱義烈矣

清兵利 八

清兵利 八

清兵利 八

清兵利 八

清史稿

列傳一百

兆惠

阿里袞

子 豐昇額 布彥達實

舒赫德

子 舒常

兆惠字和甫吳雅氏滿洲正黃旗人孝恭仁皇后族孫父佛標官至都統兆惠以筆帖式直軍機處七遷至刑部侍郎正黃旗滿洲副都統鑲紅旗護軍統領十三年命兼領戶部侍郎赴金川督糧運疏論糧運事並言諸將惟烏爾登哈攀龍勇往並及諸行省遣兵多不實上命告經略傅恒覈實師還命覈軍需調戶部侍郎赴山東按傳鈔尙書孫嘉淦偽疏稿暫署巡撫十八年命赴西藏防準噶爾十九年議用兵命協理北路軍務並督糧運二十年命駐烏里雅蘇臺準噶爾台吉噶勒藏多爾濟降命兆惠畀以牲畜是歲阿睦爾撒納叛陷伊犁命兆惠移駐巴里坤兼督額林哈畢爾噶臺站二十一年師收復伊犁上以定西將軍策楞不勝任召兆惠還京授方略未行命逮策楞並解扎拉豐阿定邊右副將軍以授兆惠時阿睦爾撒納北遁哈薩克定西將軍達爾黨阿逐捕未

得上命還師厄魯特諸宰桑從軍者謀爲亂綽囉斯汗噶勒藏多爾濟告兆惠
巴雅爾入掠其牧地兆惠令甯夏將軍和起將百人徵厄魯特兵往禦而噶勒
藏多爾濟從子扎那噶爾布及宰桑呢嗎哈薩克錫喇達什策零等陰通巴雅
爾中途變作和起死之兆惠自伊犁將五百人逐捕經濟爾哈朗至鄂壘扎拉
圖與達什策零戰大敗之逐賊戰於庫圖齊再戰於達勒奇殺賊數千二十二
年正月至烏魯木齊噶勒藏多爾濟扎那噶爾布等諸賊皆會日數十戰馬且
盡師步行冰雪中至特訥格爾遂被圍巴里坤辦事大臣雅爾哈善先遣侍衛
圖倫楚將兵八百益兆惠軍會兆惠遣軍校雲多克德楞徹自圍中出詣雅爾
哈善言轉戰狀事聞上嘉兆惠奮勇封一等武毅伯授戶部尙書鑲白旗漢軍
都統領侍衛內大臣及圖倫楚兵至圍解兆惠得新兵復逐捕巴雅爾至穆壘
河源巴雅爾已徙牧他處乃還師巴里坤上以兆惠遠道旋師逐賊不忘賚御
用玉鞮荷包鼻煙壺命同定邊將軍成袞扎布分路剪除厄魯特兆惠旋偕參
贊大臣鄂實等自額林哈畢爾噶進勦時扎那噶爾布已殺噶勒藏多爾濟會

阿睦爾撒納自哈薩克盜馬竄還伊犁掠扎那噶爾布牧地兆惠察回部頭人
布拉呢敦霍集占叛有迹令參贊大臣富德逐捕阿睦爾撒納而駐師濟爾哈
朗以待上責兆惠與成袞扎布急回部緩阿睦爾撒納失輕重兆惠乃率師繼
富德以北遣使宣諭左右哈薩克師復進次額密勒西岸富德師至塔爾巴哈
台獲逃渠巴雅爾及其孛檻送京師語詳富德傳哈薩克汗阿布賚使獻馬並
具表請入覲上降敕宣諭阿布賚使言阿睦爾撒納以二十騎來投約詰朝相
見令先收其馬並及牛羊阿睦爾撒納驚走獲其從子達什車凌宰桑齊巴罕
縛送兆惠兆惠以聞命檻車致京師兆惠分遣諸將圖倫楚三達保愛隆阿擊
敗阿睦爾撒納屬衆降其渠納木奇父子送京師兆惠復進與富德軍合誦阿
睦爾撒納已入俄羅斯上命還師旋授兆惠定邊將軍討布拉呢敦霍集占兆
惠奏請屯田烏魯木齊以來春進討倘不能卽入回部則且積穀市馬爲持重
上責其怯懦二十三年正月兆惠以厄魯特人在沙喇伯勒尙萬戶當先剿除
乃專力回部上授雅爾哈善靖逆將軍趣進師命兆惠剿厄魯特事竟別道合

攻並諭兆惠厄魯特性反覆往往自殘殺母以其烏合稍衆過疑慮兆惠與副將軍車布登扎布等分四道進勦兆惠趨博羅布爾噶蘇車布登扎布趨博羅塔拉副都統瑚爾起等趨尼勒喀侍衛達禮善等趨齊格特皆會於伊犁厄魯特衆紛紜潰竄遂盡殲焉上以賊渠哈薩克錫喇鄂哲特等十餘人皆未獲命兆惠等加意奮勉四月兆惠獲鄂哲特送京師疏言準噶爾事將蒞請自伊犁移師合攻回部上仍責兆惠俘哈薩克錫喇等既又令赴庫車察軍事還京師詔未至而兆惠師已發會雅爾哈善圍庫車霍集占突圍走上逮雅爾哈善以兆惠代將兆惠中途疏言將八百人赴庫車當與雅爾哈善協力剿賊不願覲顏遽還上獎其肫誠勇往賜雙眼孔雀翎既至軍詞霍集占自庫車出入葉爾羌城守乃帥師往捕道阿克蘇頭人頗拉特降和闐頭人霍集斯故擒達瓦齊有功至是亦來附並招烏什頭人俱降遂薄葉爾羌兆惠兵止四百自烏什至此千五百里馬行乏擇要隘屯兵霍集占出戰三敗保城不復出兆惠遣副都統愛隆阿以八百人扼喀什噶爾來路阻賊援而率師臨蔥嶺南河爲陳蔥嶺

南河者卽喀喇烏蘇譯言黑水故時謂兆惠軍爲黑水營兆惠念兵寡而城大
不任攻諜言賊牧羣在城南英奇盤山乃帥輕騎躡其牧地且致賊爲野戰渡
黑水纜四百騎而橋圯霍集占挾數千騎出師戰且戰且涉水土卒殊死戰五
晝夜殺賊數千人諸將高天喜鄂實三格特通額皆戰死兆惠馬再踏面及脛
皆傷乃收兵築壘掘濠以爲衛賊亦築壘與我師相持布拉呢敦自喀什噶爾
至助霍集占因我師靖逆將軍納穆扎爾等帥師赴援中途遇回兵力戰皆死
之上先事發索倫察哈爾健銳營及陝甘綠旗兵濟兆惠師聞兆惠被圍促富
德赴援又命阿里袞選戰馬三千送軍前兆惠發阿克蘇令舒赫德駐守至是
遣使令以被圍狀入奏上獎兆惠統軍深入忠誠勇敢進封武毅謀勇一等公
並賜紅寶石帽頂四團龍補服霍集占旣逼我師爲長圍相持數月賊自上游
引水謀灌我師壘我師於下游溝而洩之我師壘迫深林賊發鎗彈著林木中
我師伐爲薪得彈用以擊賊常不匱水不給賊引水反得飲又掘井恒得泉發
地得藏粟一百六十窖掠野得馬駝千餘迫歲暮圍合已三月軍中糧漸盡士

卒焚鞍革甚或掠回民以食布拉呢敦霍集占以圍久不下會布魯特掠英吉沙爾而兆惠卽以是日率師焚賊壘所殺傷過當疑兆惠與布魯特相約因遣使人我師請和兆惠因其使射書諭以納款當入覲二酋亦射書請撤圍相見兆惠置不更答而二酋自此攻稍緩二十四年正月富德帥師至呼爾璊遇回兵轉戰五晝夜阿里袞送馬至合軍復戰布拉呢敦出戰中彈傷還喀什噶爾師至葉爾羌河岸阿里袞與愛隆阿合軍爲右翼富德及舒赫德爲左翼逐賊以次徐進兆惠自圍中望見火光十餘里馬駝羣囂塵上知援集乃率餘軍破壘出與諸軍相合引還阿克蘇上爲賦黑水行紀其事兆惠疏辭進封及章服諭母辭並以其母老時遣人存問霍集占之黨攻和闐上以兆惠富德旣合軍急引還謂富德不得以援兆惠爲畢事兆惠爲帥被圍待援尤不當遽引師退諭趣富德援和闐兆惠當就見在兵力加意奮勉以竟全功兆惠督諸將分道進攻布拉呢敦棄喀什噶爾霍集占亦棄葉爾羌同遁兆惠師至喀什噶爾撫定餘衆富德亦收葉爾羌爲畫疆界定貢賦鑄泉幣並分屯滿漢兵駐守富德

師復進追及霍集占戰於阿勒楚爾再戰於伊西洱庫爾淖爾布拉呢敦霍集占竄入巴達克山師從之巴達克山汗素勒坦沙初言霍集占中彈死生獲布拉呢敦復言兩酋已皆死獻霍集占首上加兆惠宗室公品級鞍轡並授其子侍衛兆惠復撫定霍罕額爾德尼伯克所屬四城並齊哩克布魯特額德格納布魯特阿濟畢部衆請留兵分駐葉爾羌喀什噶爾諸城復定各城伯克更番入覲例二十五年二月師還上幸良鄉於城南行郊勞禮兆惠入謁賜朝珠及馬從上還京飲至賚銀幣圖形紫光閣二十六年七月命協辦大學士兼領刑部旋令偕大學士劉統勳按楊橋河決二十七年復偕統勳勘江南運河二十八年直隸水災命勘海口疏天津靜海諸縣水道復命偕兩江總督尹繼善籌濬荆山橋河道二十九年十一月卒上臨其喪贈太保諡文襄嘉慶元年十一月命配享太廟子扎蘭泰尙高宗女和碩和恪公主襲爵授額駙

阿里袞字松崖鈕祜祿氏滿洲正白旗人尹德第四子而訥親弟也乾隆初自二等侍衛授總管內務府大臣遷侍郎歷兵戶二部五年命與僉都御史朱必

堦如山東勘巡撫碩色報歉收失實狀疏言蘭山郟城被水最甚請緩徵新舊賦而以官帑市穀補社倉復命與江南河道總督高斌如江西勘巡撫岳濬等徇情納賄狀鞫實濬坐黜六年侍郎梁詩正奏八旗兵丁當分置邊屯復命與大學士查郎阿如奉天相度地勢上言地宜耕者吉林烏拉東北拉林阿爾楚克阿爾楚哈東飛克圖齊齊哈爾東南呼蘭西南黑爾蘇站刷煙站白都訥東八家子至登額爾者庫皆沃壤呼蘭東佛忒喜素素富林木惟地高下各異墨爾根寒暑早齊齊哈爾砂磧吉林烏拉無餘地寧古塔山深烏蘇里產蔴皆不宜耕議政王大臣用其議移屯自拉林阿爾楚哈始八年命如湖南勘巡撫許容劾糧道謝濟世狂縱狀白濟世枉命卽署巡撫歷河南山西山東諸省十四年訥親誅令分任訥親償帑旋以兄弟不相及命免之上將巡五台阿里袞疏請於臺懷建行宮太原就巡撫署增建羣室上不許阿里袞別疏薦參將傅謙大學士傅恒弟也上責其不當詔切責十五年授湖廣總督湖北巡撫唐綏祖爲前總督永興劾罷阿里袞白綏祖無受賂狀永興坐黜十六年移兩廣總督

東莞民莫信豐謀爲亂討平之尋居母憂還京師授戶部侍郎擢尙書歷刑工
戶三部兼鑲白旗漢軍都統二十一年四月命軍機處行走時上方責諸將遂
捕阿睦爾撒納定西將軍達爾黨阿出西路五月命阿里袞佐達爾黨阿在領
隊大臣上行走九月師至雅爾拉遇賊再勝十月命與達爾黨阿還京師二十
二年正月上以成袞扎布爲定邊左副將軍會師巴里坤阿里袞仍在領隊大
臣上行走二月達爾黨阿以失阿睦爾撒納削爵阿里袞亦坐降戶部侍郎旋
兼正白旗蒙古副都統時回部大和卓木布拉呢敦小和卓木霍集占分據葉
爾羌喀什噶爾爲亂於是沙拉斯瑪呼斯諸部游牧與相應九月阿里袞與都
統滿福自阿斯罕布拉克和什特克取道至哈喇沙爾搜山殺敵復進至塔本
順和爾納木噶俘男婦二百餘十二月滿福爲郭多克哈什哈誘戕沙拉斯瑪
呼斯遁庫車諸處阿里袞復進次哈喇沙爾西南庫爾勒二十三年正月復進
逐敵至呼爾塔克山獲瑪呼斯得木齊額默根等四月阿里袞自魯克察還師
駐巴里坤上先得伯克素賚瑪奏阿里袞方搜捕瑪哈沁將還師與阿里袞疏

言師向呼爾塔克山不相應上因責阿里袞中途遷延罷侍郎以副都統革職留任六月靖逆將軍雅爾哈善攻庫車霍集占赴援入城守已復走還葉爾羌上爲罷雅爾哈善而督定邊將軍兆惠攻阿克蘇遂進逼葉爾羌十一月命阿里袞選馬三千駝七百益兆惠軍兆惠攻葉爾羌不克瀕黑水結寨霍集占爲長圍困之上聞授富德定邊右將軍阿里袞參贊大臣援兆惠是月命襲封二等公十二月授兵部尙書正紅旗蒙古都統二十四年正月富德師至呼爾璦霍集占出戰五日四夜未決阿里袞以駝馬至乘夜分師爲兩翼斫陳斬千餘級布拉呢敦中創與霍集占並敗走援兆惠全師以還上以阿里袞送馬濟軍如期集事且殺賊多加雲騎尉世職例進一等公七月霍集占走巴達克山部阿里袞與富德等帥師從之降其衆萬二千有奇阿里袞以五百人駐伊西勒庫爾淖爾西截隘復分兵出其南遇敵奪其家屬輜重降二千有奇復將選兵二百踰嶺逐敵克巴達山部旋納欵以霍集占首獻行賞賜阿里袞雙眼孔雀翎二十五年召還京師六月自喀什噶爾行次葉爾羌會雅木扎爾回酋邁喇

木煬訛謂阿睦爾撒納復入阿克蘇羣起爲亂乃復還喀什噶爾率八百人出至伯什克勒木邁喇木等以千餘人拒戰阿里袞督所部擊破之賊入城堅守麾兵合圍夜四鼓城人呼號乞降邁喇木遁去上獎阿里袞應機立辦授其子拜唐阿豐昇額藍翎侍衛阿里袞旋捕邁喇木等送京師復進豐昇額三等侍衛授其次子倭盛額藍翎侍衛十月阿里袞還京師授領侍衛內大臣圖形紫光閣二十八年加太子少保二十九年授戶部尙書協辦大學士時緬甸亂南徼兵連數歲三十一年春將軍明瑞深入上授阿里袞參贊大臣馳傳至軍二月明瑞戰死猛臘大學士傅恒出爲經略授阿里袞及阿桂爲副將軍并令暫領雲貴總督率師駐永昌朝議明年進兵今歲秋夏瘴退先收普洱思茅邊外諸小部落阿里袞疏言邊外十三板納皆內屬不爲亂惟召散整貝猛勇三部附緬甸當用兵時刑部尙書舒赫德在軍與雲南巡撫鄂寧密疏議撫六月緬甸使頭人請款阿里袞拒之以聞上命置毋答並譴舒赫德等七月阿里袞疏請絕緬甸貿易並治雲南省城至永昌道撫慰沿邊諸土司借帑俾市籽種

牛具皆得愈旨十二月阿桂至兵共發兵出邊未深入而還三十四年二月上
摘雲貴總督明德疏語以軍中馬羸責阿里袞等下部議奪職命寬之三月傅
恒至軍與阿里袞等議進兵渡憂鳩江西攻猛拱猛養兩土司向阿瓦阿瓦緬
甸都也偏師至猛密夾江而下造舟蠻暮通往來七月師行初阿里袞病瘍上
遣醫就視良愈至是復大作傅恒令留永昌治疾阿里袞堅請行師進緬甸兵
不出十月傅恒還師蠻暮復進攻老官屯駐憂鳩江口緬甸兵水陸並至傅恒
阿桂軍江東阿里袞軍江西迎戰敵結寨自固阿里袞率兵七百攻之敵百餘
棄寨走把總姚卓殺敵奪其旗師銳進敵四百餘亦遁復戰會日暮敵不能堅
守皆引去凡破寨三殺敵五百餘傅恒亦邁疾諸將議毋更進兵阿里袞曰老
官屯賊寨前歲額爾登額攻未克距此僅一舍不破之何以報命策馬行傅恒
以下皆從之寨堅攻不克阿里袞疾甚猶強起督攻視鎗礮最多處輒身當之
傅恒慮其傷令將舟師毋更與攻寨十二月卒於軍諡襄壯祀賢良祠以豐昇
額金川功追加封號爲果毅繼勇公子豐昇額倭興額色克精額布彥達賚豐

昇額自三等待衛襲封一兵公擢領侍衛內大臣署兵部尙書廂藍旗蒙古都統三十五年八月命在軍機處行走金川再用兵定邊左副將軍溫福爲帥劾參贊大臣伍岱乖謬上命豐昇額往勘因授豐昇額參贊大臣五月豐昇額攻東瑪寨僞退以致敵令章京佛倫泰富爾賽突起偪寨侍衛伸達蘇發鉅礮敵驚卻多墜崖死遂克東瑪六月攻固卜濟山梁師至色爾渠令烏什哈達三泰等左右進攻豐昇額出中路發礮墮碉烏什哈達等引兵出巖下豐昇額自山徑策應鏖戰敵大奔七月復克色爾渠大碉及卡房百餘卡房敵所置堠也旋與溫福大軍合十月克路頂宗喀木色爾諸寨復進克兜烏山梁及附近諸寨十一月克博爾根山奪瑪覺烏大寨再進克明郭宗下碉卡九十餘克嘉巴山焚經樓語詳溫福傳十二月授豐昇額副將軍三十八年正月與將軍溫福副將軍阿桂議分道並進溫福自功噶爾拉進攻噶爾薩爾阿桂自僧格宗經納圍納扎木至當噶爾拉待溫福軍至與合攻噶爾拉依豐昇額自章谷吉地經綽斯甲布溫福分遣參贊大臣舒常駐軍於此與合攻勒烏圍豐昇額駐軍宜喜

於其地設糧臺規進取四月考績加太子少保溫福師銳進六月次木果木阿
桂亦克當噶爾拉上令豐昇額攻大板昭命未至木果木師潰溫福死之上聞
敗命豐昇額引兵自黨壩三雜谷至巴朗拉爲阿桂聲援旣聞阿桂自當噶爾
拉全師而出屯翁古爾壘諭豐昇額仍駐宜喜爲犄角豐昇額初未移軍分兵
駐智固山防後路阿桂以定西將軍爲帥十一月收小金川全境豐昇額自宜
喜攻克沙壩山梁碉卡分敵勢十二月阿桂定策自取谷噶而令豐昇額攻凱
立葉進兵上命豐昇額以五千人往攻三十九年正月師次薩爾赤鄂羅山占
其南雪山又分兵屯孟拜拉山梁阿桂遣納木扎等將二千人與合軍二月晦
夜半豐昇額帥師自達爾扎克北山澗越石踢雪以進次日黎明至凱立葉山
麓山絕險凡大峰各置碉見我師至且近鎗石並發豐昇額督師直前衝擊與
侍衛彰靄明仁取第二峯瑪爾占伊達里取第三峯令領隊大臣五岱營第三
峯下捷聞上以碉據峯巔仰攻不易克命留五岱於此而移軍谷噶與阿桂合
軍攻勒烏圍阿桂遣諜告豐昇額達爾扎克面當莫爾敏山山旁地曰迪噶拉

穆扎師得此繞出凱立葉後來攻易爲力豐昇額卽遣兵占莫爾敏山敵力爭絕我師前後不相屬卒敗敵取迪噶拉穆扎豐昇額尋從上命移軍谷噶六月克色綳普破碉十一七月克該布達什諾大碉十月自間道克墨格爾陟曰爾巴當噶西峯破碉寨二百餘得凱立葉山梁之半命議叙賚玄狐帽貂馬褂十一月攻格魯古了口通黨壩遂進逼勒烏圍四十年正月克甲爾納堪布卓沿河諸碉寨四月破噶爾丹寺及噶朗噶木柵十七五月克了口石碉八木城四再進盡墮遜克爾宗諸碉寨敕獎其奮勉命封號加繼勇字七月師至章噶碉甚堅碉外爲濠三重濠外立木柵海察攻其中豐昇額督官達色仁和等攻其左右毀柵覆濠以度師緣碉側直上自其巔俯攻遂克之並得其旁木城八月與阿桂合克勒烏圍九月復進向噶拉依十二月克格隆古科布曲山梁四十年正月克瑪爾古當噶山梁金川全部悉定師圍噶拉依上命加豐昇額一等子以其弟布彥達賚襲爵尋移戶部尙書賜雙眼孔雀翎二月金川曾索諾木出降致京師四月師還賚御廐馬具鞍轡圖形紫光閣四十二年十月卒贈

清 史 稿
太子太保諡誠武布彥達賚自三等侍衛累遷武備院卿嘉慶間授戶部尙書
正白旗滿洲都統步軍左翼總兵署統領五年卒贈太子太保諡恭勤布彥達
賚女爲宣宗元妃道光元年冊諡孝穆皇后禮成追封三等公

舒赫德字伯容舒穆魯氏滿洲正白人徐元夢孫也舒赫德自筆帖式授內閣
中書累遷御史充軍機處章京乾隆二年疏言八旗生齒日繁盛京黑龍江寧
古塔三省土沃可耕請將閒散移屯並條議設公庫以各省稅務專屬旗員贖
旗地典於民者以官地畀無地旗丁以十年爲期次第施行上以稅務專屬旗
員爲非是諭曰舒赫德此議但知旗人生計艱難不知國家設關欲稽察姦宄
非爲收稅之員身家計也朕日以砥礪廉隅勉臣工尙恐其不能遵奉而可以
謀利導之乎况各省稅務本未分滿漢旗員有廉潔者何嘗不可派委大抵爲
上者施逮下之仁惟有勵以忠勤示以節儉爲下者皆當早作夜思宣力供職
以永受國家惠養方可謂之計長久蓋厚其生計不可不思而長貪以爲惠下
則未見其利而且貽害非所以教旗員亦非所以愛旗員也初雍正間京師設

官米局收旗丁餉米存儲平糶舒赫德疏請復設從之五遷至兵部尙書移戶部尙書十三年命從經略大學士傅恒征金川授參贊加太子太保十四年師還留辦軍需奏銷命往雲南湖廣河南查閱營伍並勘雲南金沙江運銅水道舒赫德疏言金沙江下游銅運無阻上游四十餘灘多峻險仍當陸運總督張允隨言上下游皆疏通語不實古州總兵哈尙德因古州被水請移城上令舒赫德相度舒赫德請城內外疏積水無待移建十月復移兵部尙書十五年疏言定例額兵百人闕二謂之名糧爲軍中公使錢惟繕治軍器巡防路費每不給於用馬兵不宜於東南其在西北十居其八亦可量減籐牌兵全無實用擬於馬兵籐牌兵內加增名糧以備公用廷議允行十二月命如浙江勘海塘十六年命勘永定河工又命如浙江按杭州覺羅額爾登受賕狀十七年命偕侍郎玉保赴北路軍防準噶爾十八年以準噶爾內亂撤防召還命如江南塞銅山張家馬路河決時準噶爾達瓦齊復爲台吉所部杜爾伯特台吉車凌等來降準噶爾宰桑瑪木特烏梁海得木齊扎木參瑚圖克等追車凌先後闌入北

路卡倫上命舒赫德如鄂爾坤治軍事而令侍郎玉保前鋒統領努三散秩大臣薩喇爾佐定邊左副將軍成袞扎布十九年春舒赫德至軍參贊大臣達清阿誘致瑪木特將檻送京師疏聞上以瑪木特聞召卽至命釋使還旣薩喇爾努三帥師出邊獲扎木參瑚圖克舒赫德等復疏請檻送京師上以瑪木特誘致扎木參等乃逐捕所得事不同責舒赫德謬誤命以扎木參等囚置軍中軍中方傳達瓦齊遣其將扎努噶爾布以五千人犯邊成袞扎布等致書達瓦齊言瑪木特扎木參等以入邊被捕本末上以爲太懦諭舒赫德等上方以準噶爾內訌將乘時收烏梁海以薩喇爾本蒙古頭人習邊事將倚以招致舒赫德等疏言達瓦齊復爲台吉烏梁海等未易招致令薩喇爾駐軍卓克索待後舉上責舒赫德畏怯使薩喇爾掣肘蒙古貝勒額琳沁公格勒克巴木丕勒以赴軍遷延得罪舒赫德等疏言其至軍後奮勉請贖罪上下詔責其舛謬並及行文達瓦齊事下部議奪官得旨寬免上幸熱河召舒赫德詣行在示方略旋解成袞扎布將軍以授策楞七月輝特台吉阿睦爾撒納來降舒赫德與策楞議

留阿睦爾撒納及諸頭人軍中待命以其帑移置蘇尼特阿睦爾撒納有兄爲瑪木特所獲乞資以行糧俾赴援舒赫德不許是時上方欲倚阿睦爾撒納擒達瓦齊事聞上盛怒詔罪狀策楞舒赫德略謂阿睦爾撒納初來降乃以其眷屬移置戈壁南相距數千里使其父母妻子分析離居失遠人歸附心準噶爾內亂所部叩關內附正可示以懷柔永綏邊境策楞舒赫德顛倒外謬至於此極皆奪職以閒散在參贊大臣上效力贖罪並籍其家罪及諸子二十二年正月上命阿睦爾撒納佐班第帥師討達瓦齊阿睦爾撒納請移游牧於烏里雅蘇臺上許之命領隊大臣兆惠駐軍於此予舒赫德章京銜佐兆惠六月師已定伊犁諭曰策楞舒赫德軍前効力今大功已成本欲施恩開其自効策楞已予都統銜駐軍巴里坤檢舒赫德筆札雖無怨望語乃效漢人習日必記事作詩嗣宜痛自改悔令仍以章京留烏里雅蘇臺上分準噶爾故地本衆建諸侯意四衛拉特各爲汗阿睦爾撒納求爲總統上不許遂叛其妻子在烏里雅蘇臺舒赫德借兆惠收送京師二十一年喀爾喀台吉青滾雜卜叛驛道中梗會

察哈爾兵數百送羊至舒赫德留之分布諸台站軍報乃通行邊至努兌木倫護厄魯特人掠馬者烏梁海人入邊竄匿俄羅斯馳檄往索上嘉其治事尙協機宜召還授正黃旗漢軍副都統二十二年正月上命成袞扎布爲定邊將軍逐捕阿睦爾撒納授舒赫德參贊大臣尋擢兵部尙書兼鑲黃旗漢軍都統三月以舒赫德在軍獨具疏奏事責其放縱罷尙書七月疏請防範沙喇斯遊牧內移上斥其藉作歸計嚴諭申戒十二月上以成袞扎布師久無功詔罪狀舒赫德略言舒赫德起自廢籍初赴軍授方略令傳諭成袞扎布並戒其毋更恇怯乃至軍後諸事皆失機宜卽如招服克特烏魯特等遊牧當收其馬以佐軍乃任令屯駐山中致兵過復叛及朕有旨詰責始東遮西露往來道途疲馬力於無用之地舉此一端可見諸事皆無成算此實舒赫德未將朕旨宣示成袞扎布之所致也舒赫德罪不勝誅朕念成袞扎布去年擒青滾雜卜之功賞舒赫德以不死令奪職爲兵從軍贖罪二十三年予頭等侍衛銜駐阿克蘇十月將軍兆惠逐捕霍集占深入被圍命定邊右副將軍富德往援授舒赫德參

贊大臣會於巴爾楚克舒赫德以阿克蘇通葉爾羌喀什噶爾要隘當設卡倫
上嘉之擢吏部侍郎遷工部尚書鑲紅旗滿洲都統賜孔雀翎十二月簡阿克
蘇銳卒諸路兵先至者馳援兆惠二十四年正月與富德合軍解兆惠圍予雲
騎尉世職七月命移駐葉爾羌旋命仍駐阿克蘇先後奏定回城賦稅台站酌
設伯克阿克蘇鑄騰格以四存公六畀回人阿克蘇庫車哈喇沙爾烏什和闐
置文武吏皆得旨議行尋以回部平圖形紫光閣二十八年加太子太保二十
九年命如福建按提督黃仕簡劾廈門洋行陋規總督楊廷璋以下皆得罪語
詳廷璋傳三十一年署陝甘總督旋署戶部尚書三十二年如湖南北讞獄三
十三年將軍明瑞征緬甸敗績死之上命大學士傅恒爲經略授舒赫德參贊
大臣先赴雲南籌畫進軍舒赫德密疏議巡忤上旨下部議奪官並削雲騎尉
世職命以都統銜參贊大臣出駐烏什三十六年土爾扈特汗渥巴錫等自俄
羅斯來歸衆疑其僞降舒赫德力白無他志命如伊犁宣撫尋授伊犁將軍十
一月授戶部尚書三十八年加太子太保授武英殿大學士九月命如江南監

黃河老壩口隄工壽張民王倫叛破臨清命督師進剿克之倫自燔死賜雙眼孔雀翎復予雲騎尉世職賚貂冠黑狐褂四十一年金川平圖形紫光閣初舒赫德爲伊犁將軍子舒甯在京杖斃二奴得罪上命發伊犁交舒赫德約束及是又以爭煤礦爲山東民所訟舒赫德縛舒甯送刑部疏請罪下部議奪官命寬之四十二年四月卒贈太保諡文襄祀賢良祠子舒常始爲侍衛舒赫德議移置阿睦爾撒納妻子得罪舒常亦奪官發黑龍江披甲及舒赫德召還爲副都統授舒常三等侍衛舒赫德以佐成袞扎布無功再得罪舒常復發黑龍江乾隆二十三年二月命釋還累遷至鑲藍旗護軍統領三十七年將軍溫福征金川授參贊大臣金川平圖形紫光閣與舒赫德父子並列前五十功臣舒赫德卒令還京治喪授工部侍郎出爲貴州巡撫遷湖廣兩廣總督入爲工部尙書復出署江西巡撫復爲湖廣總督荊州漢水決奪官授一等侍衛擢都察院左都御史改鑲黃旗蒙古都統嘉慶初署刑兵二部尙書卒諡恪靖

論曰兆惠再就圍中受爵得援師克竟其功而爲之援者前則雅爾哈善後則

富德顧坐法不克有終訥親之誅也高宗謂策楞達爾黨阿皆愧奮阿里袞獨
內疑遇事畏蕙然策楞達爾黨阿先後僨事奪封阿里袞以戰閱承世祚豐昇
額繼之慶延於後嗣舒赫德初爲御史有直聲後出視軍高宗屢言其懦再被
譴謫終致台司功名始終之際蓋亦有天焉然其要必歸於忠謹茲非彰彰可
觀者歟

清史稿

列傳一百零一

策楞

子特通額 特清額

玉保

達爾黨阿

哈達哈

子哈寧阿

永常

覺羅雅爾哈善

富德

薩賴爾

策楞鈕祜祿氏滿洲鑲黃旗人尹德長子乾隆初為御前侍衛二年秋永定河決上出帑命策楞如蘆溝橋賑災民累遷為廣州將軍授兩廣總督廣東巡撫託庸劾布政使唐綏祖贓私下策楞勘讞策楞雪綏祖枉上嘉其秉公尋加太子少傅移兩江總督其弟訥親承父爵進為一等公以征金川失律坐譴十三年十月命策楞襲爵仍為二等公復移川陝總督旋以川陝轄地廣析置二督策楞專領四川時大學士傅恒代訥親為經略命策楞參贊軍務傅恒受金川降班師行賞策楞加太子太保西藏郡王珠爾默特那木札勒狡暴謀為亂上命策楞戒備十五年冬駐藏大臣傅清拉布敦誅珠爾默特那木札勒為其黨

所戕西藏亂上命策楞及提督岳鍾琪督師戡難時西藏公班第達獲逆渠卓呢羅卜藏扎布戢兵侍命策楞以聞請率八百人以往留軍駐打箭爐待徵發策楞至西藏與鍾琪及侍郎兆惠駐藏大臣納穆扎爾班第等審定規制爲西藏善後章程語詳西藏傳雜谷土司蒼旺浸梭磨卓克基二土司爲亂策楞與鍾琪發兵討之上以川兵弱當瞻對金川用兵後元氣未復誠慎重師戰勝獲蒼旺收其地內屬策楞丁母憂解官還京師江南淮揚水災命偕尙書劉統勳往勘因疏河工積習總督高斌以下皆坐黜卽令策楞署南河總督河決銅山張家馬路上以河工非所習改授兩廣總督時準噶爾曾達瓦齊庸懦所部內訌上銳意用兵十九年二月召策楞命出視師授定邊左副將軍阿睦爾撒納之降也尙書舒赫德在軍察其狙詐慮且復叛策楞與共議以所攜部族置戈壁南而留阿睦爾撒納及諸頭人丁壯勝兵者從軍上聞阿睦爾撒納降將倚以取達瓦齊得策楞等疏怒甚命削職以閑散在參贊上效力贖罪發諸子各行省駐防披甲上遂用阿睦爾撒納爲定邊左副將軍導我師討達瓦齊二十

年五月師定伊犁上降詔猶責策楞舒赫德恆怯乖張幾債事旋以師有功于策楞副都統銜令率偏師戍巴里坤九月阿睦爾撒納叛去上以永常爲定西將軍命策楞參贊大臣上行走旣聞當阿睦爾撒納叛時永常引師自穆壘左次巴里坤罷永常將軍以命策楞旋詔逮永常授扎拉豐阿爲將軍策楞疏言待軍士器械隨將軍進兵詔併逮策楞謂懲其懦也尋以罪在永常貸策楞令屬扎拉豐阿督饗會準噶爾宰桑克什木等陷伊犁定北將軍班第等死事策楞馳疏聞請合兵進討上復授策楞副都統銜參贊大臣扎拉豐阿未至攝將軍策楞與喀爾喀諸部貝勒合兵擊敗準噶爾部落授內大臣眞除定西將軍上督諸將逐捕阿睦爾撒納甚急二十一年二月策楞聞台吉諾爾布等已得阿睦爾撒納騰章奏捷上告於陵廟進策楞一等公賜雙眼孔雀翎寶石帽頂四團龍補服三月策楞復疏言前奏非實上命停封賞嚴促進兵逐捕是月復克伊犁阿睦爾撒納走哈薩克四月命大學士傅恒視師逮策楞及參贊大臣玉保旋得策楞奏方督兵壓哈薩克境令擒阿睦爾撒納以獻上乃令傅恒還

京師時達爾黨阿出西路哈達哈出北路與策楞合軍以進師久次不得阿睦爾撒納蹤跡九月達爾黨阿哈達哈引兵還屯哈薩拉克十一月復命逮策楞王保檻送京師途遇準噶爾兵爲所戕子特通額初發黑龍江披甲二十三年以侍衛從將軍兆惠討霍集占戰黑水與總兵高天喜等同戰死圖形紫光閣列後五十功臣特請額初發杭州披甲自上虞備用處拜唐阿十一遷至嘉慶間授成都將軍嘗兩攝四川總督會有爲蜀都賦訐長吏者給事中胡大成以聞仁宗命工部尙書託津光祿寺少卿盧蔭溥詣勘特清額坐徇隱降三級留任未幾卒特成額初發西安披甲自黏竿處拜唐阿再遷三等侍衛師討大金川酋索諾木高宗命特成額從征轉戰兩年自資理北山下克美美卡諸地攻榮噶爾博最高峯奪康薩爾山半石礮破密拉噶拉木山果木城特成額皆有功授貴州威寧鎮總兵乾隆四十二年上以勳舊世家有世爲領侍衛內大臣因以豐昇額遺缺授特成額三遷授禮部尙書爲成都將軍三攝總督尋除湖廣總督五十年歲旱湖北江蘇浙江皆饑特成額疏請發湖南倉穀賑湖北有

餘平值以糴使商自四川販米至者見湖北穀值低得輸以濟江浙上獎其不分畛域得大臣體尋移雲貴總督以李侍堯代督湖廣侍堯疏發上年旱饑孝感民無食掠富家儲穀諸生梅調元者糾衆與抗生瘞二十三人上震怒逮特成額籍其家旋予副都統銜充烏什辦事大臣又坐在湖廣失察屬吏侵帑案牘壅積屢被譴責及荊州隄決復逮下獄論絞久之赦授頭等侍衛烏魯木齊辦事大臣嘉慶初自科布多參贊大臣授兵部侍郎未上卒

玉保烏朗罕濟勒門氏蒙古鑲白旗人自理藩院筆帖式三遷郎中乾隆三年擢侍郎八年率準噶爾使者入藏熬茶賜孔雀翎十二年復率準噶爾使者入藏熬茶疏言前次入藏自巴延喀喇納木齊圖穆倫至穆魯烏蘇渡口道甚險時方秋冬間少雪行旅尙便今冬令大雪擬改道踰哈什哈嶺左巴延喀喇巴山後自布魯爾仍至穆魯烏渡口報可十六年遷正黃旗蒙古都統十七年達瓦齊爲亂命偕尙書舒赫德赴北路防邊十八年杜爾伯特台吉策凌等來降命馳赴犒勞上以玉保習準噶爾事命以參贊大臣佐軍事十九年輝特台吉

阿睦爾撒納來降復命馳赴犒勞率以入覲二十年阿睦爾撒納叛命仍以侍郎參贊大臣出北路師次哈齊克遣兵至鄂什默納河收阿睦爾撒納所屬三百餘戶搜山獲阿睦爾撒納黨得木齊班咱等進次安集雅哈殲阿巴噶齊所屬三百餘戶圍班雜游牧尋從逆喇嘛達什藏布並收其妻子擢內大臣二十一年策楞疏報已獲阿睦爾撒納行賞玉封保三等男世襲玉保獲從賊達永阿言阿睦爾撒納相距僅一日玉保執送策楞又得從賊烏遜言阿睦爾撒納方出痘所部尙有厄魯特兵八千哈薩克兵三千亦執送策楞上責玉保退縮玉保師復進遣諸將烏爾登等追至庫隴癸嶺得從賊額林沁言阿睦爾撒納已踰嶺入哈薩克境引還次固勒扎上怒策楞玉保不得阿睦爾撒納策楞又疏言玉保馳檄謂阿睦爾撒納卽日就禽無煩大軍深入因是勒兵未進遂命併逮詣京師旋命姑寬之玉保疏辨未嘗馳檄阻策楞進兵上謂玉保卽未阻策楞進兵阿睦爾撒納脫於誰手因斤其畏憚欺飾削男爵奪參贊大臣改授領隊大臣玉保疏言阿睦爾撒納僅餘從賊二三人投哈薩克汗阿布賚正督

兵往索上以玉保明知叛賊子身無助始直前追逐斥其取巧命尙書阿里袞詣軍逮策楞並諭玉保已率兵向哈薩克免其罪未行則併逮尋達爾黨阿疏報玉保師已臨哈薩克命授頭等侍衛旋以師久次不得阿睦爾撒納命仍逮治與策楞同送京師道死

達爾黨阿鈕祜祿氏滿洲鑲黃旗人理藩院尙書阿靈阿次子初襲曾祖額亦都一等子爵累官吏部尙書訥親得罪請從軍師還加太子少保十九年出爲黑龍江將軍策楞得罪命襲封二等公是年十二月上用阿睦爾撒納討達瓦齊以班第爲定北將軍授達爾黨阿參贊大臣二十年正月命將索倫巴爾呼兵詣軍五月定伊犁師還命協辦大學士及阿睦爾撒叛授定邊左副將軍偕贊大臣哈達哈出北路率師逐捕十月改授右副將軍出西路而以哈達哈當北路十二月復以將印授扎拉豐阿達爾黨阿仍爲參贊大臣二十一年正月又以鄂勒哲依薩賴爾同掌將印達爾黨阿帥師至珠勒都斯迎薩賴爾及策楞報獲阿睦爾撒納達爾黨阿亦賜雙眼孔雀翎尋自特訥格爾赴安集海分

兵略唐古特游牧旋以阿睦爾撒納竄入哈薩克上命西路專任達爾黨阿北路專任哈達哈督兵壓哈薩克境使擒阿睦爾撒納以獻五月復授右副將軍時策楞駐登努勒台令達爾黨阿還師達爾黨阿不從上卽解策楞定西將軍以命達爾黨阿八月師次雅布拉哈薩克汗阿賚遣頭人和集博爾根率四千騎分二隊從阿睦爾撒納走魯臘而自率千餘騎西行會於毫阿臘克山下達爾黨阿師至遇和集博爾根前隊自山谷中誘使出突其中堅斬五百七十餘級獲頭人楚魯克逐敵至努喇遇和集博爾根後隊復戰陷陳得其纛斬三百四十餘級阿睦爾撒納部宰桑言阿睦爾撒納易藍纛以戰戰敗易服遁哈達哈亦擊破阿布賚軍獲頭人昭華什兩軍合遣楚魯克昭華什還諭其渠時阿睦爾撒納走不過一二里許遇楚魯克等使還報僞爲哈薩克頭人語待其汗阿布賚至且執阿睦爾撒納以獻達爾黨阿信之按兵以待阿睦爾撒納從容捫載去上聞不得阿睦爾撒納命繳雙眼翎召還京師罷協辦大學士二十二

年二月奪爵左授正白旗滿洲副都統八月軍中俘阿睦爾撒納從子達什策

楞檻致京師上始聞達爾黨阿哈達哈緩追逸賊狀俱奪官發熱河披甲二十三年授三等侍衛率西安駐防兵赴軍師有功進二等侍衛卒

哈達哈瓜爾佳氏滿洲鑲藍旗人黑龍江將軍傅爾丹子傅爾丹初襲曾祖費英東二等信勇公乾隆元年追論失律罪黜以哈達哈襲是時哈達哈已自侍衛累遷領侍衛內大臣兼勳舊佐領既襲爵復遷鑲紅旗滿洲都統工部尙書加太子少保署兵部尙書步軍統領十九年師討達瓦齊授參贊大臣佐定北將軍班第出北路尋改領隊大臣二十年達瓦齊就俘再出師討阿睦爾撒納復授參贊大臣佐定邊左副將軍達爾黨阿出北路哈達哈請將索倫喀爾喀兵爲前鋒上獎其奮勉尋命代達爾黨阿爲定邊左副將軍當北路移軍布延圖南自伊克斯淖爾北至烏哈爾哈及烏里雅蘇台剗卜堪諸形勝地皆分兵列戍二十一年命自阿爾泰進兵詔以北路專任哈達哈特楞古特宰桑敦多克圖爾班和卓等與我師遇僞請降哈達哈察其詐斬敦多克繫圖爾班和卓等殪其衆上嘉其勇再授領侍衛內大臣賜雙眼孔雀翎師至嵩哈薩拉克山

Page not available.

Please help scan and add.

页面不可用。

请协助扫描添加。

贊責薄於將軍又念濟爾哈朗力戰有勞命繫獄待秋決十一月富德師至巴達克山遣使令縛送霍集占上以達爾黨阿哈達哈皆在軍不自奮請行詔詰責因言哈寧阿秋讞本當決哈達哈稍有事效尙當寬宥今豈可曲貸重念費英東勲勞不忍刑諸市命賜自盡且令馳諭哈達哈達哈已先以十月卒於軍

永常董鄂氏滿洲正白旗人自三等侍衛累遷鑲紅旗滿洲都統乾隆五年命如安西按事卽授安西提督屯哈密賜孔雀翎紅絨結頂冠十五年授湖廣總督羅田民馬潮柱爲亂討平之十八年上將征準噶爾命爲欽差大臣駐安西旋移陝甘總督加太子少保輝特台吉阿睦爾撒納來降言達瓦齊昏暴上決策用兵召永常詣京師諭行軍機宜遂以內大臣授定西將軍時上倚阿睦爾撒納及來降宰桑薩賴爾取達瓦齊以阿睦爾撒納副定北將軍班第出北路以薩賴爾副永常出西路仍諭阿睦爾撒納薩賴爾爲軍鋒敕永常督軍鋒先發永常令諸道軍兼程並進上責其誤永常師次巴里坤命還肅州永常還督

饒有所計畫上皆不謂然師定伊犁俘達瓦齊詔責永常但知師行糧隨沾沾議接濟今功已成何慮糧不足因糧於敵從來勝算如永常奏輾轉挽運動逾數十日庸有濟乎因左授吏部侍郎阿睦爾撒納叛犯伊犁永常師左次上責其怯懦罷內大臣定西將軍以副都統銜爲參贊厄魯特諸台吉有不從阿睦爾撒納叛者宰桑扎木參等率數千人詣永常請附屯永常疑其詐挾宰桑爲質兼程卻走恐賊躡其後徵策楞赴援並檄阿敏道引還同駐巴里坤上命奪官逮京師行至臨潼道卒仍籍其家戍其子拉林

覺羅雅爾哈善字蔚文滿洲正紅旗人雍正三年繙譯舉人自內閣中書四遷乾隆三年授通政使御史邱玖華疏論九卿議事不公別疏請錄用賢良祠大臣子孫雅爾哈善劾玖華爲原任侍郎勵宗萬門生宗萬祖杜訥爲賢良祠大臣玖華劾九卿議事不公示剛正實爲起宗萬地上謂錄用賢良祠大臣子孫不過虛銜微秩視其材可用然後用之豈有嘗爲侍郎獲罪因賢良祠大臣子孫而輒起者勵宗萬雖愚計不出此玖華所論九卿議事不公切中時弊諸臣

見之宜深自儆省若遷怒建言者是爲不知恥命解雅爾哈善任令莊親王允祿平郡王福彭會大學士以下嚴鞫雅爾哈善言語得之右通政陳履平因請皆奪官上責王大臣議不當命奪雅爾哈善官履平下吏議四年特起四川龍安知府五年以憂去六年授江南松江知府移蘇州知府九年遷福建汀漳道雅爾哈善在松江蘇州皆有聲績其去民思之十三年以福建按察使署江蘇巡撫上元民燬制錢雅爾哈善論如律復以數少乞原上責其寬縱命奪職留任十五年雅爾哈善議經徵未完不及一分知縣許惟枚等皆劾罷總督黃廷桂劾不當下吏議當奪官仍命留任尋入爲戶部侍郎十六年復出爲浙江巡撫十九年復入爲戶部侍郎命軍機處行走旋授兵部侍郎二十年師討阿睦爾撒納授參贊大臣出北路二十一年命改赴西路令駐巴里坤辦事疏請徙布庫努特降人於烏蘭烏蘇與前降噶勒雜特人同牧未幾綽羅斯汗噶勒藏多爾濟叛噶勒雜特人哈薩克錫喇等與爲響應回部降人莽噶里克亦從之雅爾哈善擒其黨並其子白和卓十二月上獎雅爾哈善實心治軍事加內大

清史稿卷一百一十五
臣銜和碩特降酋沙克都爾曼吉不與阿睦爾撒納之亂率所部徙巴里坤附城爲牧地以居噶勒藏多爾濟巴雅爾之叛上寄諭雅爾哈善令密察沙克都爾曼吉蹤跡雅爾哈善方內疑又以饟不時至沙克都爾曼吉請糧不能給乃使裨將閻相師將五百人入其壘若迷途借宿者夜大雪相師吹笳督兵襲其廬沙克都爾曼吉驚起其妻與相抱持至死不釋其衆四千餘人殲焉雅爾哈善疏報沙克都爾曼吉與綽羅斯叛黨扎那噶爾布相通戮以杜後患又遣兵赴魯克察克剿莽噶里克上嘉其奮往二十二年春定邊右副將軍兆惠自伊犁率師逐捕噶勒藏多爾濟等雅爾哈善遣侍衛圖倫楚將八百人益兆惠軍提督傅魁師至鹽池遇莽噶里克率三十二人入塞探白和卓消息傅魁執而殺之雅爾哈善疏聞上以莽噶里克爲叛首當讞定行誅命逮傅魁送京師兆惠師自濟爾哈朗至特納勒爾爲敵圍得圖倫楚援乃解尋召雅爾哈善還京師戶部侍郎四月復授參贊大臣令駐濟爾哈朗九月擢兵部尙書十二月令移駐魯克察克總理屯田二十三年二月命爲靖逆將軍帥師討霍集占五月

師至庫車霍集占所屬頭人阿卜都克勒木城守雅爾哈善督師合圍斷其水草城賊出戰屢敗之六月敗援賊於托木羅克霍集占自將八千人具最精巴拉烏槍行阿克蘇戈壁來援雅爾哈善督兵戰庫車南斬千餘級霍集占負傷入庫車獲其纛庫車依岡爲城以柳枝沙土密築甚堅礮攻不能入提督馬得勝策穴地入城距城北一里爲隧已及城雅爾哈善督之急我兵夜秉燧入穴城賊見火光於城內爲橫溝水入隧我兵皆沒頭人鄂對告雅爾哈善曰庫車食且盡霍集占必出走城西鄂根河水淺可涉北山通戈壁走阿克蘇宜分兵屯此二隘霍集占可擒也雅爾哈善以鄂對新降不可信越八日霍集占乘夜引四百騎啓西門涉鄂根河遁又數日阿都卜克勒木復夜遁餘頭人阿拉難爾等率老弱出城降雅爾哈善雜訊城人謂沙呢雅斯等五人爲阿都卜克勒木死黨因殺之疏入上聞不得霍集占盛怒奪雅爾哈善官雅爾哈善劾副都統順德訥疎縱又劾馬得勝失機上曰雅爾哈善始劾順德訥繼劾馬得勝無一語引罪不思身任元戎指麾諸將者誰之責歟此而不置之法國憲安在命

兆惠至軍斬順德訥以徇逮雅爾哈善及得勝送京師二十四年正月逮至命王公大臣會鞠以雅爾哈善老師糜餉失機事論斬遂見法後二日並斬得勝自雅爾哈善死高宗知沙克都爾曼吉無叛狀賦詩斥其殺降

富德瓜爾佳氏滿洲正黃旗人駐防吉林乾隆初自護軍擢至三等侍衛十三年從經略大學士傅恒征金川擒賊黨阿扣遷二等侍衛師還累遷副都統二十年師征準噶爾命送綽羅斯台吉噶勒藏多爾濟等赴軍擢參贊大臣督西路臺站阿睦爾撒納所屬唐古忒部見阿睦爾撒納入伊犁謀遁去二十一年富德帥師至鄂塔穆和爾遇唐古忒衆千餘營樹林蒲葦中擊殺二十餘人追至色白口山內賊據險分隊抵禦奪寨六斬獲無算唐古忒部遁伊犁追至察罕鄂博復遇哈薩克兵千人與唐古忒隊合富德奮勇衝擊斬百餘級奪回被掠集賽噶雜特三十餘戶擒台吉恩克巴雅爾等四十餘人上獎富德奮勉授正黃旗蒙古都統二十二年定邊將軍成袞扎布赴巴里坤以富德爲參贊大臣定邊右副將軍兆惠疏報與成袞扎布分道進兵命富德從兆惠軍阿睦爾

撒納還掠扎那噶爾布游牧富德追剿收復巴爾達穆特各鄂拓克得叛酋巴雅爾蹤跡遂深入逐捕奪隘五至愛登蘇哈薩克汗阿布賚遣使降阿睦爾撒納逃入俄羅斯尋死叛酋哈薩克錫喇布庫察罕未獲命富德逐捕二十三年招右部哈薩克圖里拜及塔什罕回人圖爾占俱來降遣使入覲上以富德在軍久招撫西哈薩克有勞予雲騎尉世職是時雅爾哈善討霍集占無功兆惠代將師銳進被圍命富德爲定邊右副將軍赴援二十四年正月軍次呼爾璜遇賊騎五千轉戰五日四夜會參贊大臣阿里袞送馬至分翼馳突賊衆大潰殺巴爾圖十五人大伯克數十人賊千餘酋布拉呢敦中鎗傷劇昇入城旋遁喀什噶爾兆惠解圍出以功封三等伯師進次葉爾羌河岸復戰敗賊進封一等成勇伯霍集占黨侵和闐富德赴援破賊進攻葉爾羌霍集占兄弟棄城遁追敗之于阿勒楚爾又敗之於伊西洱庫爾淖爾竄巴達克山軍從之令擒獻巴達克山汗素勒坦沙獻霍集占首師還進封一等靖遠成勇侯賜雙眼孔雀翎官其子侍衛授領侍衛大臣二十五年復授御前大臣圖形紫光閣賜紫禁

城騎馬命軍機處行走尋授理藩院尙書正黃旗蒙古都統副都統老格盜官駝事發鞫實言寄馬富德牧廠有牲畜數千上以富德暴貴安得有牧廠命都統巴爾品勘驗旋奏富德家產擁資至三萬餘命和親王等會鞫得富德出兵時留官馬索蒙古王公牲畜並攜緞布煙茶牟利狀下獄吏議當斬上命改監候二十八年赦授散秩大臣三十三年將軍明瑞征緬甸死綏參贊大臣額勒登額坐逗遛得罪額勒登額亦吉林駐防與富德有連富德坐誤舉罷散秩大臣下獄吏議當斬上命入綏決三十六年赦授三等侍衛三十八年將軍溫福征金川軍潰木果木發健銳火器兩營兵益阿桂軍授富德頭等侍衛爲領隊大臣從副將軍明亮出南路富德自眞登梅列舊卡進兵克得布甲喇嘛寺得里兩面山梁日寨策爾丹色木諸隘復進克僧格宗馬柰絨布寨卡卡角諸隘授副都統待闕復進克沙錫理穆當噶爾碉卡羊圈河橋四十四年請撥兵三千往宜喜助明亮允之攻噶咱普得婁奪卡五攻布咱爾尼山梁奪沿河卡五攻庚額特山梁奪大碉三卡八攻噶咱普得爾窩賊棄碉竄追至馬爾邦乞降

富德從軍二年未能大有摧破屢下詔敦責之至是命下部叙功金川平阿桂
劾富德濫賞侵土兵鹽菜銀兩彌不足下桂林覈實復命袁守侗如川會阿桂
具獄富德密上清字疏訐阿桂上命檻送京師廷訊乃具服濫賞並以銀六錠
入己又受知府曾承謨餽金五十兩並劾副將廣著不待命卽令其充兵廣著
自戕死清字疏復稱阿桂手持黃帶語不遜坐誣告大逆例當斬遂見法

薩賴爾蒙古正黃旗人本厄魯特頭人隸準噶爾台吉達什達瓦爲宰桑乾隆
十五年準噶爾內亂薩賴爾率所屬四十七戶降安置察哈爾命入旗授散秩
大臣準噶爾台吉喇嘛達爾扎請遣薩賴爾歸不許授參贊大臣出北路十九
年烏梁海得木齊扎木參入邊薩賴爾以五百人禦之擒扎木參而遣收凌朔
岱訥庫勒等十人還事聞授內大臣旣遣還諸人來告宰桑雅爾都得木齊阿
茂海欲來歸乞駐牧烏蘭固木克木克木齊克薩賴爾言雅爾都等親阻許駐
特斯河否則驅之阿爾台山外並請發厄魯特兵聽調尙書舒赫德以爲未便
上諭薩賴爾相機而行命舒赫德會同薩賴爾及車凌等選台吉宰桑可信任

者將兵二百人並令侍衛永柱會總管阿敏道選察哈爾八旗兵五百交薩賴爾爲招諭驅逐之用薩賴爾兵至卓克索烏梁海宰桑雅爾都車根赤倫察達克圖布慎瑪濟岱各鄂拓克竄徙阿爾台山外薩賴爾奏烏梁海等已遠遁但貪戀故土必仍回收彼時整兵速出易於收服請暫撤兵還允之輝特台吉阿陸爾撒納來降命薩賴爾迎勞頒賞旋偕喀爾喀貝子車木楚克扎布等以千八百人擊雅爾都車根赤倫察達克四宰桑於察罕烏蘇敗之獲牛馬無算初有扎哈沁宰桑庫克新瑪木特者犯卡倫僞追之弗獲達青河誘執之上責其不武令縱之去瑪木特移牧布拉罕託輝不卽降道遇通瑪木特被擒繫之諾海克卜特勒薩賴爾訶知之自烏蘭山後掩擒通瑪木特並獲庫克新瑪木特送軍營安置其戶畜於庫卜克爾克勒上嘉之授子爵世襲遷正白旗領侍衛內大臣時定議征達瓦齊命薩賴爾爲定邊右副將軍二十年正月率師偕參贊大臣鄂容安等出西路師行厄魯特降者於途中肆劫上戒鄂容安以己意諭薩賴爾使自斂戢阿睦爾撒納請移牧烏里雅蘇台招輝特部衆上察其意

叵測諭薩賴爾令防範並促其進兵薩賴爾等疏報扎哈沁得木齊巴哈曼集以三百餘戶宰桑敦多克以千餘戶來降復遣侍衛瑚集圖招諭達瓦齊同族台吉噶勒藏多爾濟尋率台吉諾海奇齊等三十餘人來降詔封爲綽羅斯汗上諭獎薩賴爾解所佩荷包以賜並賜雙眼孔雀翎三月薩賴爾與諸將和起齊努渾自羅克倫督兵赴博羅塔拉與北路班第等軍合疏言招撫倬羅斯台吉袞布扎卜等皆率所屬來降凡四千餘戶葉爾羌哈什哈爾和卓木獻玉盤請降令各回原牧降人請與地耕牧令往吐魯番莽噶里克處受地阿睦爾撒納屬人二百餘及額林哈畢爾噶窮夷八百餘戶令附屬扎哈沁宰桑有牲畜者畀籽種令其耕牧並自羅克倫啓行馳檄達瓦齊曉諭利害上獎其籌畫妥協以御用寶石朝珠賜之薩賴爾兵至登努勒台將軍班第等亦至尼楚袞兩軍合達瓦齊居伊犁河西格登不設備五月西路軍自固勒扎渡口越推墨爾里克嶺直抵格登達瓦齊驚遁未幾就擒伊犁平詔封薩賴爾一等超勇公賜寶石頂四團龍服六月軍還徵阿睦爾撒納入覲薩賴爾同班第鄂容安駐守

伊犁留兵五百爲衛七月阿睦爾撒納謀叛逗遛途中班第等屢疏入告薩賴爾亦以爲言上密諭諸臣擒治弗能決阿睦爾撒納遂遁其徒克什木等爲亂班第鄂容安死之薩賴爾更衣降十二月薩賴爾遣使詣巴里坤辦事大臣和起以阿睦爾撒納蹤跡告請發兵往擊和起以聞上令將軍策楞傳諭慰勞賚荷包鼻煙壺俟其至賜之又命理藩院員外郎唐喀祿董其游牧二十一年正月薩賴爾脫出至吐魯番巴里坤參贊大臣達爾黨阿率兵往會薩賴爾疏請罪上令駐特訥格爾仍授定邊右副將軍三月策楞疏言侍衛巴寧阿自伊犁歸言克什木之亂將軍班第等自固勒扎赴崆格斯禦之賊甫至薩賴爾欲奔鄂容安曰賊來當戰胡急走薩賴爾答言爾何知遂策馬去衆從之班第等僅餘司員侍衛及衛卒六十人夜賊至班第等遂自殺上命逮薩賴爾入都鞫實以薩賴爾降人貸其死命錮之獄班第等喪還執克什木馘以祭令薩賴爾觀之尋以叛黨漸次就擒釋出獄二十四年授散秩大臣鑲白旗蒙古副都統乾清門行走旋擢內大臣復封二等超勇伯卒圖形紫光閣

論曰國重有世臣然承平久富貴宴安恆不足任使出任軍旅兵未接將已內
怯幾何不僨事耶策楞輩擁兵玩寇其病正坐此雅爾哈善文墨吏其殺降亦
以內怯富德族微力戰致通顯有功而不善居卒以遘禍薩賴爾反覆迹甚著
獨以降人蒙寬典幸矣

諸以刑人安其典幸矣
 以內由高宗末歲代雖有臨御亦而不善思不及變論論諸國又變也故善
 由變而不創也非矣對擊與天家其誠玉坐也謝謝命善文其其其其其其
 備日國事皆世烈烈不八官實意也其不臣也其出也軍旅又未其其其其

清史稿

列傳一百二

高天喜

鄂實 三格

和起

唐喀祿

阿敏道

滿福

豆斌

端濟布

諾爾本

高天喜甘肅西甯人天喜本準噶爾人雍正中為我師所俘高氏撫為子因從其族籍從軍累擢保甯堡守備乾隆二十二年副將軍兆惠擊伊犁天喜從參將邁斯漢赴援遇噶勒雜特賊百餘擊殺之獲其駝馬既聞兆惠被困濟爾哈朗議馳救邁斯漢怯不進巴里坤辦事大臣雅爾哈善以聞上即奪邁斯漢官以命天喜尋遷金塔協副將再遷西甯鎮總兵授領隊大臣二十三年十月師攻葉爾羌兆惠議出間道襲取賊輜重渡黑水天喜督兵修橋度師未及半賊大至天喜聞兆惠陷賊陳舍橋亟赴之奮與賊戰與鄂實三格特通額俱沒於陳上賦詩惜之諡果義又賜其家白金千鄂實西林覺羅氏滿洲鑲藍旗人大

學士鄂爾泰第二子出爲叔父鄂禮後自廕生授三等侍衛累遷本旗副都統左翼前鋒統領兄鄂容安死阿睦爾撒納之亂鄂實請從軍授參贊大臣佐定邊將軍成袞扎布出西路二十二年夏成袞扎布令逐捕扎那噶爾布鄂實以地險馬疲中道引還上手詔詰責曰若謂地險賊何以能行若謂馬疲賊馬何獨能壯健左授藍翎侍衛是冬鄂實逐扎哈沁賊斬一百四十餘級獲牲械上謂今當大雪馬力應疲乏尙能勦賊彼時鄂實爲參贊大臣有事但諉諸將軍茲以負罪乃直前剿賊朕知其隱矣量遷三等侍衛死事上令仍視前鋒統領賜卹諡果壯三格棟鄂氏滿洲正白旗人自諸生授藍翎侍衛累遷黑龍江副都統命將索倫巴爾呼兵三千佐參贊大臣策楞出西路爲領隊大臣策楞以怯懦逮三格亦坐奪官旋復授正白旗蒙古副都統攻呼爾璦台吉賽音伯勒克等再戰掠其牧地予三等輕車都尉世職二十二年春定邊將軍成袞扎布令逐捕扎那噶爾布未得秋師至博羅和羅遇叛黨額林沁達瓦等百餘戶三格與戰會布魯古特台吉璉齊呼爾璦台吉達瓦斬扎那噶爾布僞請降並請

招額林沁達瓦三格信之遽引師還琿齊等旋遁去坐奪官並創世職以兵伍自效死事上命仍視副都統賜卹諡剛勇天喜鄂實三格並祀昭忠祠予騎都尉兼雲騎尉世職回部平圖形紫光閣特通額策楞子也附見策楞傳

和起馬佳氏滿洲鑲藍旗人其先世阿音布國初以軍功授拜他喇布勒哈番世職和起襲職授盛京協領累擢甯夏副都統乾隆十九年命與侍衛海福將千人佐定西將軍永常討達瓦齊遷寧夏將軍永常劾和起兵不及額而和起先疏言將九百人以往留百人護輜重上得永常疏不之罪也尋又命偕提督豆斌爲巴里坤辦事大臣策楞代永常爲定西將軍復劾和起送兵馬遲誤當奪官留任旋復官授欽差大臣關防召詣京師諮軍事達什達瓦所屬宰桑訥默庫曼集烏達瑚們都等在軍私還游牧命和起嚴鞠得實以降人請予寬典上不許命正軍法二十一年十一月輝特台吉巴雅爾叛掠扎哈沁五百餘戶定邊右副將軍兆惠令和起將索倫兵百人往按檄吐魯番伯克莽阿里克等集闢展而噶勒雜特宰桑哈薩克錫喇布魯特台吉尼瑪陰應巴雅爾詭以兵

五百會和起望兵至疑之令莽阿里克調之給告曰我兵也逾時尼瑪等操戈前莽阿里克自後謀賊衆蠶集和起所將兵僅百人負重創手刃數賊股中槍徒步轉戰至夜力盡和起垂死命索倫侍衛努古德彰全布突圍出以所戴孔雀翎爲識報兆惠遂死之諡武烈追封一等伯以一等子世襲祀賢良昭忠二祠二十三年師還獲尼瑪及其子檻送京師命戮於和起墓前子和隆武自有傳

唐喀祿他塔喇氏蒙古正藍旗人自筆帖式再遷理藩院員外郎乾隆十九年賜副都統銜命赴北路軍董理新降輝特台吉阿睦爾撒納班珠爾等游牧地唐喀祿疏言班珠爾所屬多老稚不能耕慮飢餒上以距耕時尚遠責其瑣屑命撤還扎薩克林丕勒多爾濟初命同董理游牧將軍別有指揮唐喀祿疏請留上責其不當左遷理藩院筆帖式尋復授員外郎命送濟隆呼圖克圖自巴林赴伊犁董理定邊右副將軍薩喇爾游牧復賜副都統銜授領隊大臣將駐防扎布堪兵千人從定邊右副將軍哈達哈赴哈薩克逐捕阿睦爾撒納賊渠

因爾班和卓遁入烏梁海唐喀祿報哈達哈督兵擒之賜孔雀翎阿睦爾撒納令其徒達瓦藏布入掠唐喀祿令索倫總管鄂博什將五百人禦之降其衆三百尋命屯科布多授理藩院侍郎鑲藍旗蒙古副都統唐喀祿行按諸部輝特降人屯扎克賽每自相劫奪請移屯呼倫貝爾齊齊哈爾諸地喀爾喀俘獲扎哈沁特楞吉特奇爾吉斯烏爾罕濟蘭諸部人萬餘請以扎哈沁人移駐卡倫內特楞吉特奇爾吉斯烏爾罕濟蘭人給東三省兵丁爲奴杜爾伯特游牧請移烏蘭固木上並從其請師出西路擊哈薩克錫喇命唐喀祿屯額爾齊斯爲聲援阿睦爾撒納敗走唐喀祿調知杜爾伯特貝勒巴圖博羅特台吉阿喇善等潛與相結遣兵攻之輝巴朗山禽阿喇善等並戮烏梁海五十餘戶遂赴塔爾巴哈台逐捕阿睦爾撒納及哈薩克錫喇賜御用荷包鼻煙壺師至塔爾巴哈台糧罄馬乏唐喀祿引師退疏言遵旨撤兵上怒左授藍翎侍衛佐定邊左副將軍納穆扎爾出北路降人和碩齊上擢用至散秩大臣至是令護哈薩克來使入邊上命納穆扎爾遣唐喀祿將二百人迎之阿睦爾撒納竄俄羅斯上

命唐喀祿偕和碩齊駐額爾齊斯偵禦二十三年三月土爾扈特舍稜等謀走俄羅斯上命偕和碩齊逐捕四月師次布固圖河獲舍稜弟勞章扎卜勞章扎卜詭爲兄乞降唐喀祿未敢信和碩齊遽縱之還越日舍稜詭約降獻酒和碩齊飲之邀唐喀祿過其營賊噪而起唐喀祿及侍衛富錫爾穆倫保佛爾慶額力戰均遇害和碩齊更衣降事聞賜騎都尉世職祀昭忠祠富錫爾佛爾慶額皆滿洲鑲黃旗人穆倫保滿洲正白旗人皆賜雲騎尉世職

阿敏道圖爾格期氏蒙古鑲紅旗人世居察哈爾父阿吉斯康熙間討噶爾丹以員外郎從軍中道糧匱兵苦飢阿吉斯言於衆曰我等官兵世受國恩甘斃道路誓竭力前進衆皆諾於是有昭莫多之勝聖祖嘉其能予拖沙喇哈番世職卒阿敏道襲職雍正初累遷二等侍衛九年命將巴里呼兵百人自固爾班塞堪赴巴爾坤佐軍又命偕侍讀學士查克丹調喀爾喀兵三千率之往尋復偕護軍統領費雅思哈赴烏爾輝音扎罕練兵乾隆元年準噶爾乞和撤軍阿敏道還京授鑲藍旗察哈爾總管十九年師收烏梁海將察哈爾兵以從加副

都統銜二十年遷所獲巴爾沁人等於齊拉罕師定伊犁定北將軍班第奏以阿敏道督臺站是年阿睦爾撒納叛班第陷賊阿巴噶斯哈丹附逆肆掠台站中斷阿敏道輒督兵巡徼使驛遞恒得相續會定西將軍永常自木壘退駐烏爾圖布拉克撤阿敏道還上永奪常官以策楞代將命阿敏道將精騎詣伊犁求班第消息策楞不卽遣上詰責之尋將千人捕阿巴噶斯哈丹賊衆二十一年授鑲藍旗蒙古副都統時回酋布拉呢敦霍集占有異志定邊右副將軍兆惠調知之阿敏道將索倫兵百厄魯特兵三千赴葉爾羌喀什噶爾慰撫且使致二渠至庫車霍集占在焉閉城拒我師阿敏道斬游騎四十餘圍之城人詭言曰厄魯特吾仇慮爲害撤還卽納降阿敏道遂命厄魯特兵退僅留索倫兵百或慮有變阿敏道曰吾招撫回衆惟期於國有濟何暇他慮遂入爲霍集占所執二十二年上諭諸將檄霍集占送阿敏道還不從謀加害庫車伯克呼岱巴爾以告阿敏道謀脫歸不克死之二等男署察哈爾營總旺扎勒及諸裨將綳科壽金吹扎木蘇七巴克薩拾並索倫兵百人皆從死事平諸有功者圖形

紫光閣阿敏道列後五十功臣加世職爲騎都尉兼一雲騎尉祀昭忠祠旺札勒加雲騎尉綳科等皆予雲騎尉世職

滿福瓜爾佳氏滿洲鑲藍旗人自世管佐領累擢拉林副都統乾隆二十二年遷都統駐巴里坤命將吉林兵千人屯吐魯番尋授領隊大臣定邊將軍成袞扎布出珠勒都斯令滿福將三百人巡視阿勒輝至烏納哈特十三臺站搜勦嗎哈沁沙拉斯嗎唬斯旣降復叛掠臺站上命滿福自阿勒輝往勦又令巴里坤辦事大臣阿里袞帥師與會阿里袞未至滿福師次背色嶺與賊遇擊之賊敗走僞遣人乞降且言賊渠已就縛請除道迎滿福信之行次哈喇和落徑險林密下臨深溝滿福悟爲賊所紿急麾前隊返賊千餘突自林中出圍我師滿福厲聲督兵力戰被創墜溝死之上以滿福雖爲賊所愚惑其捐軀命如陣亡例議卹諡武毅祀昭忠祠圖形紫光閣

豆斌陝西固原人初以馬兵入提標累遷肅州鎮標中軍守備雍正間從征準噶爾力戰受創賜白金四百遷川陝督標前營游擊準噶爾犯科舍圖率兵擊

走之乾隆初累遷提督自廣東移廣西疏言各營鳥槍舊式大小參差坐臥倚伏不能應手又質薄易熱難收實用請照陝西威字號纏絲鎗式改製下兩廣總督議行俄調還固原又命以提督銜領湖北宜昌鎮總兵事尋復歷甘肅安西提督命討準噶爾師將標兵出駐巴里坤以輸軍馬後時下吏議旋乞病罷居數月復授安西提督仍令赴巴里坤兆惠師師攻霍集占於庫車命斌將所部從充領隊大臣徼巡魯克察克闕庫車諸地驛路兆惠被圍黑水斌從副將軍富德自阿克蘇兼程赴援師次呼爾璊霍集占以五千人迎戰我師分兩翼賊據高岡斌率中軍火器進攻賊知我師馬力乏擁衆相逼阿里袞解馬至斌偕衆將夾擊脇中創仍力戰賊大敗創甚遂卒諡壯節祀昭忠祠予騎都尉兼雲騎尉上製詩惜之回部平圖形紫光閣孫霽襲世職官至山東登州鎮總兵端濟布瓜爾佳氏滿洲鑲黃旗人自前鋒累遷頭等侍衛鑲黃旗察哈爾總管乾隆二十二年上令選兵千佐定邊將軍兆惠出西路自朱爾圖斯赴瑪納斯獲得木齊鄂羅斯並所部三百人馬駝牛羊二千餘扎哈沁頭人巴哈曼集叛

走端濟布偕侍衛奎瑪岱追捕至小衛和勒津降所部二百戶又得掠臺站賊
札木布師捕治厄魯特頭人噶爾藏多爾濟扎那噶爾布等布魯古特台吉璉
齊呼爾璉台吉達瓦斬扎那噶爾布詣端濟布軍請降端濟布遽引師還璉齊
達瓦復叛去上懲端濟布惟事姑息命靖逆將軍雅爾哈善按治師至羅克倫
孟古圖嶺獲噶爾藏多爾濟宰桑羅卜札尼瑪得木齊敦多克檻送巴里坤上
聞命貸端濟布罪扎哈沁得木齊哈勒拜等謀掠臺站參贊大臣哈寧阿檄端
濟布往捕至瑪納斯得間諜十餘渡河至美羅托山賊遁收其游牧牲畜師圍
庫車端濟布將吉林厄魯特兵以從霍集占將三千人自賽里木來援屯高阜
端濟布偕侍衛順德納等奮擊斬二千餘級師攻葉爾羌霍集占築臺城東北
端濟布及侍衛諾爾本將右翼後隊攻之賊拒戰復斬二千餘級兆惠被圍於
黑水端濟布從定邊左副將軍富德赴援十餘戰至呼爾璉與兆惠軍會賜三
等輕車都尉世職授鑲紅旗滿洲副都統師逐賊戰於阿爾楚爾再戰於伊西
洱庫爾淖爾端濟布將二百人截賊逃路偵山有賊寨越嶺攻之被創賜號塔

什巴圖魯師還圖形紫光閣列前五十功臣卒贈都統諡壯節祀昭忠祠諭以
端濟布力戰受傷與陣亡者無異也諾爾本吳機格式氏滿洲正藍旗人以前
鋒從軍富德獲宰桑烏巴什遣諾爾本送兆惠軍道遇賊力戰賜號克籌巴圖
魯師圍庫車霍集占來援諾爾本偕公袞楚克侍衛齊凌札卜齊努渾等擊賊
右翼賊敗走逐之六十餘里至鄂根河口斬獲甚衆賊逃入蘇巴什山復偕齊
努渾入山搜戮溫詔嘉焉師攻葉爾羌偕端濟布戰城東敗賊師還命在乾清
宮行走賚銀帛賜騎都尉加一雲騎尉世職圖形紫光閣擢頭等侍衛從明瑞
征緬甸擊賊被創尋令將兵屯騰越還京擢圍場總管加副都統銜卒
論曰高天喜驍勇善戰與鄂實三格奮門破陳死事爲最烈和起等倉卒爲賊
陷慷慨授命斌與端濟布以力戰受創得與戰死者同其血食旌勇勵忠當如
是也

瑚爾起

愛隆阿

弟巴靈阿

舒明

福祿

齊里克齊

閻相師

伊柱

努三

烏勒登

瑚爾起瓜爾佳氏滿洲鑲藍旗人自筆帖式累遷協領乾隆十三年從征金川遷呼倫貝爾總管二十年從征準噶爾加副都統銜二十一年從參贊大臣達爾黨阿自珠爾都斯逐捕阿睦爾撒納詢知阿睦爾撒納竄哈薩克從定邊左副將軍哈達哈以師臨之哈薩克汗阿布賚拒戰擊敗之斬百餘級得馬二十餘獲其頭人言阿睦爾撒納方在泥雅斯圖山檄阿布賚禽獻杜爾默特貝勒巴圖伯羅特等潛通阿睦爾撒納起與戰輝巴朗山執伯羅特盡殲其部衆及阿睦爾撒納所留烏梁海五十餘戶沙喇斯瑪呼斯既降復叛掠臺站而布魯古特台吉琿齊等戕察哈爾總管巴寧阿以叛上命瑚爾起偕鄂實三格

副哈寧阿將千人駐濟爾哈朗巴里坤適中地捕琿齊及沙喇斯瑪呼斯部衆
瑚爾起偕鄂實追勦札哈沁逃賊又偕副都統巴圖濟爾噶勒自呼斯坦至尼
勒喀河偵琿齊等百餘戶遯牧突擊執之尋從師自伊犁逐勦諸回部至善塔
斯巔招降布嶺特頭人圖魯啟拜鄂庫及其部衆搜捕阿里瑪圖河逸賊上以
索倫兵從征久召瑚爾起及副都統鄂博什率以還瑚爾起等仍請從軍將軍
兆惠攻霍集占於葉爾羌被圍定邊右副將軍富德檄瑚爾起及巴圖濟爾噶
勒率索倫兵自伊拉里克赴援以馬駝未至負糧械步行戈壁中上獎諭卽授
正白旗蒙古副都統師至巴爾楚克兆惠圍已解與富德軍合霍集占之徒阿
卜都克勒木等侵和闐攻哈拉哈什侍衛齊凌扎卜請援兆惠令瑚爾起與巴
圖濟爾噶勒督兵赴援齊凌扎卜馳告夜行至伊立齊賊聞兵至引退訶知賊
騎七百餘屯博爾齊天大霧瑚爾起督兵突擊賊潰走追至皂窪勒河斬百餘
級收回人四千餘戶和闐遂平上賦博羅齊行紀事賜瑚爾起雲騎尉世職師
自喀喇烏蘇逐捕霍集占至阿爾楚爾賊設伏兩山間我軍張兩翼擊之賊敗

走三十里負山而屯瑚爾起等自山麓橫衝入陳師夾擊賊大敗越山遁師從之至伊西洱庫爾淖爾瑚爾起等爲伏東山側擊賊復大敗霍集占竄入巴達克山巴達克山汗素勒坦沙獻霍集占首瑚爾起將索倫兵還賚銀幣圖形紫光閣列前五十功臣瑚爾起疏言呼倫貝爾多水泉可耕請選塔雅沁降回百戶往耕上命瑚爾起以副都統爲呼倫貝爾總管董其事移黑龍江副都統從征緬甸收猛拱猛養諸地卒於軍賜騎都尉併前世職爲一等輕車都尉祀昭忠祠

愛隆阿覺爾察氏滿洲正黃旗人自前鋒侍衛累遷齊齊哈爾副都統乾隆二十一年授領隊大臣赴巴里坤軍營偕參贊大臣富德逐捕巴雅爾至愛登蘇遇阿布賚部衆突出數與戰却之自巴爾楚克至濟爾哈朗置臺站逐賊沙喇博和什嶺遇都爾伯特納木奇游牧乞降旋遁去愛隆阿追及之殺千餘人納木奇遂納款師至察罕烏蘇收厄魯特宰桑烏魯木游牧百餘戶師屯濟爾哈朗命愛隆阿駐守濟爾哈朗巴里坤適中地尋從靖逆將軍雅爾哈善討霍集

占先是愛登蘇之戰侍衛奇徹布戰沒至是愛隆阿上言前擒巴雅爾奪還奇徹布尸富德未及疏列定邊將軍兆惠疏言愛隆阿原報所無事後追論顯爲爭功請嚴議詔原之師圍庫車賊來之援愛隆阿等與戰於戈壁殲賊甚衆霍集占將五千人續至愛隆阿等率吉林及索倫兵千騎逐賊至鄂根河側與戰迫賊入水死者三千餘人拔其纛驛致京師上爲賦回纛行獎其能戰旋從將軍兆惠至葉爾羌與霍集占部衆戰當左翼兆惠被困靖逆將軍納穆札爾赴援愛隆阿將兵截喀什噶爾賊援路徼巡臺站至托罕塔罕遇賊勦殺百餘人上授愛隆阿參贊大臣令與定邊右副將軍富德援兆惠愛隆阿戰呼爾璫再戰葉爾羌河遂與兆惠軍合尋引兵駐烏什兼防喀什噶爾予雲騎尉世職復從富德逐霍集占戰於伊西洱庫爾淖爾徼巡臺站值嗎唬斯賓巴等謀劫察罕烏蘇臺站以兵追襲斬獲殆盡進騎都尉世職師還授正白旗護軍統領兼鑲白旗蒙古副都統圖形紫光閣列前五十功臣再進一等輕車都尉兼一雲騎尉世職授伊犁參贊大臣卒弟巴靈阿自親軍校累遷二等侍衛授察哈爾

總管賜坤都爾巴圖名號授領隊大臣博羅齊搜捕厄魯特部衆遇伏戰死賜雲騎尉世職圖形紫光閣列後五十功臣

舒明烏梁海濟勒莫特氏蒙古正黃旗人自二等侍衛累遷都察院左副都御史正黃旗護軍統領命赴北路軍爲諸部降人董理游牧旋授吏部侍郎訶知降人納默庫戕臺站侍衛謀以所部叛馳奏勅參贊大臣阿蘭泰往捕治阿蘭泰請益兵上責其紛擾納默庫就擒上以舒明籌策得宜而阿蘭泰推諉遲誤奪阿蘭泰三等男爵畀舒明舒明在邊諸部降人至者爲之拊循噶雜特宰桑根敦降上授佐領使與丹畢游牧同處都爾伯特台吉伯什阿噶什烏巴什降上授伯什阿噶什親王烏巴什貝子游牧額爾齊斯舒明爲陳請留屯哈達青吉勒達什達瓦部降編爲三旗移阿爾台其續至者使處扎哈沁舊游牧地策凌烏巴什巴圖博羅特及達瑪林等部衆貧甚疏請賑上爲發米六百石上聞和托輝特青滾雜卜將叛命舒明詞之舒明言叛已著命會將軍成袞札布等捕治授參贊大臣成袞札布令將科布多兵二百以往上命侍衛巴賽阿勒泰

將三百人爲舒明佐旋命偕成袞札布駐烏里雅蘇臺授理藩部侍郎再遷綏遠城將軍兼領歸化城都統二十七年卒子雅滿泰襲三等男累遷正白旗蒙古副都統坐事左授頭等侍衛與保泰同充駐藏大臣廓爾喀侵後藏與保泰同得罪荷校被杖復起至頭等侍衛卒

福祿旺察氏蒙古正白旗人自護軍校累遷福建甯鎮總兵內移正藍旗蒙古副都統外授直隸宣化廣東右翼諸鎮總兵又內移正紅旗漢軍副都統乾隆二十三年授參贊大臣駐烏里雅蘇臺旋命將索倫兵二千人赴巴里坤時定邊左副將軍成袞札布與參贊大臣阿桂會討舍楞福祿請具三月糧自科布多輸送從之至海拉爾與御前侍衛敦察會師進旋佐將軍兆惠討霍集占偕定邊右副將軍富德帥師次呼爾璊霍集占以五千餘人來犯福祿偕領隊大臣永慶率索倫察哈爾兵擊之自己至申與賊戰十餘次賊潰去進次葉爾羌河岸城賊突圍出富德與福祿等領中軍自右進追賊渡河賊屢敗兆惠自葉爾羌出至阿爾吉什偵鄂斯璊方侵和闐疏請富德福祿帥師策應上命福

祿偕策布登札布以兵堵霍集占竄俄羅斯路旋命駐軍和闐予雲騎尉世職遷杭州將軍準噶爾平圖形紫光閣上巡浙江福祿督駐防兵肄武製閱武詩獎之調西安將軍授領侍衛內大臣以老乞休卒

齊里克齊蒙古鑲黃旗人初爲額魯特人以地爲氏乾隆二十年師征準噶爾來降準噶爾平從定邊將軍兆惠擊霍集占戰於霍爾果斯霍集占敗走降頭人圖魯啟拜等授藍翎侍衛護哈薩克使臣詣京師遷三等侍衛復從定邊右副將軍富德擊霍集占至色勒庫爾敵踞山以拒齊里克齊偕前鋒參領喀木齊布督健銳營兵自山陰攀登仰擊霍集占敗遁降所部二千餘人獲軍器駝騾賜布哈巴圖魯勇號師還命在乾清門行走圖形紫光閣再遷頭等侍衛予雲騎尉世職三十一年從將軍明瑞征緬甸遇賊於底麻敗之賜副都統銜召回京再遷鑲黃旗蒙古副都統三十七年師征金川命督健銳營從參贊大臣阿桂出南路授領隊大臣攻美諾克之金川平師還領健銳營嘉慶初教匪起送察哈爾馬如湖北軍事竟卽還上以未請從軍詔詰責奪官削世職尋授鑲

黃旗蒙古副都統卒

閻相師字渭陽陝西高臺人入伍累遷安西前營遊擊雅爾哈善謀誅厄魯特
降人沙克都爾曼吉天大雪相師將五百人僞爲失道求寄宿其壘夜分鳴笳
驟起殺沙克都爾曼吉殲其部衆四千餘人尋偕副將丑達將千人赴魯克察
克同額敏和卓逐回酋莽阿里克錄功遷金塔寺營副將屯田吐魯番擢甘肅
肅州鎮總兵賜花翎從雅爾哈善討霍集占授領隊大臣圍庫車力戰被創師
克阿克蘇以相師駐守已復隨勦霍集占於葉爾羌授安西提督駐喀什噶爾
未幾改甘肅提督移駐庫車上命屯田烏魯木齊凱旋入覲賚銀幣圖形紫光
閣引疾罷予食全俸旋卒贈太子太保諡桓肅相師軀幹修偉有至性旣貴念
親不逮養每食泣下得俸與兄弟不問出入所居鎮夷堡地萬畝爲濬渠灌溉
數百家利賴之

伊柱薩克達氏滿洲正白旗人父塔勒馬善雍正間以副都統將歸化城兵從
征噶爾丹策凌將軍達爾濟駐伯格爾世宗命塔勒馬善參贊軍務署前軍統

領逐賊至額得爾河源駐軍烏里雅蘇臺乾隆初權定邊左副將軍召還師復
征準噶爾命赴額爾齊斯屯田二十一年授北路參贊大臣復召還授護軍統
領卒伊柱自佐領再遷索倫總管偕副都統濟福侍衛德爾森保赴喀爾喀車
臣部捕盜得通賊二十四年從將軍兆惠討霍集占霍集占之棄葉爾羌走也
副將軍富德等逐之至阿爾楚爾賊設伏兩山間師分三隊奮擊伊柱領右翼
戰自辰至午賊大潰翼日至巴達克山界伊西洱庫爾淖爾賊據險守師分道
進攻樹回纛降賊萬餘伊柱偕巴圖濟爾噶勒等堵山後策應富德遣侍衛賽
普圖等諭巴達克山汗使禽霍集占以獻伊柱駐兵卡倫爲聲援瓦罕伯克率
所部降尋巴達克山汗素勒坦沙函獻霍集占首回部平伊柱將千人駐喀什
噶爾護諸降人屯田伊犁師還上御豐澤園宴勞賜伊柱緞十二白金五百伊
柱復出領屯田爲置臺守望疏渠灌溉農隙督佃伐木作屋以居上諭令加意
開拓遷鑲藍旗蒙古副都統從將軍明瑞征緬甸擊賊老官屯卒於軍進三等
輕車都尉世職

努三瓜爾佳氏吉林滿洲正黃旗人自前鋒再遷頭等侍衛御前行走乾隆十一年四川總督慶復勦下瞻對頭人班滾命努三如慶復軍慶復疏報班滾焚死罷兵張廣泗代慶復言班滾現在慶復坐得罪努三罷御前行走尋授鑲白旗蒙古副都統正藍旗護軍統領十八年師征準噶爾命從湖廣總督永常籌軍事旋帥師駐鄂爾坤準噶爾宰桑瑪木特闌入卡倫授參贊大臣命會將軍成袞札布逐捕努三與參贊大臣薩賴爾護軍統領烏勒登合軍軍不戢雜取牲畜努三獲逃人特赫拜哈都未聞上烏勒登收烏梁海縱逃人巴朗上詰責努三烏勒登下定北將軍班第等按治努三烏勒登自陳收牲畜匿以自私事始薩賴爾上以薩賴爾新降不知法度責努三等不得以此諉過尋讞上坐失巴朗罪當斬詔錄其前勞恕死留軍仍籍其家旋授藍翎侍衛再遷頭等侍衛命與左都御史何國宗赴伊犁測天度繪地圖送兵詣巴里坤請回京左授藍翎侍衛留巴里坤差遣招撫巴爾達穆特各鄂拓克有勞三遷鑲藍旗護軍統領督巴里坤屯田兆惠被圍黑水努三從定邊左副將軍富德往援至呼爾璜

分兩翼擊賊與兆惠軍會賜騎都尉世職師還賜銀幣累遷領侍衛內大臣正藍旗滿洲都統卒諡恪靖烏勒登烏禮蘇氏滿洲正白旗人自前鋒累遷鑲黃旗蒙古副都統護軍統領乾隆十三年從征金川經略大學士傅恒至軍令駐軍馬奈十八年師征準噶爾授參贊大臣駐烏里雅蘇臺扎哈沁宰桑瑪木特等闌入卡倫烏勒登偕喀爾喀副都統策登扎卜將五百人與參贊大臣努三分道捕治參贊大臣薩爾賴收烏梁海烏勒登自索郭克策應俘獲甚衆尋坐縱逃人巴朗並與努三匿所獲烏梁海牲畜罪當斬貸死從軍尋授頭等侍衛命選厄魯特宰桑厄勒錐音等兵赴伊犁討賊加副都統銜授領隊大臣進剿阿巴噶斯哈丹等遊牧阿睦爾撒納竄哈薩克定西將軍策楞遣烏勒登將千人從參贊大臣玉保逐捕玉保中道引還烏勒登師至庫隴癸嶺阿睦爾撒納脫走逮詣京師廷鞫言初聞阿睦爾撒納遁請發兵速追之策楞玉保俱不允後從玉保往復請追擊玉保止發兵五十至庫隴癸嶺僅餘二十人駝復乏阿睦爾撒納於師行日已過嶺竄哈薩克上以其言實貸死授三等侍衛在乾清

門行走尋仍遣赴軍定邊將軍兆惠招降布勒特部頭目圖魯啓拜令烏勒登
自珠木罕至圖固斯塔老宣詔護降人入覲擢頭等侍衛授參贊大臣令捕瑪
哈沁並截霍集占逃路尋以捕瑪哈沁不力令在領隊大臣上行走師還累遷
鑲黃旗蒙古都統左翼前鋒統卒

論曰從兆惠富德討霍集占有功諸將校若瑚爾起愛隆阿殲敵擐旗見於詠
歌厥績懋焉舒明逐叛拊降以勞受爵福祿努三與呼爾璊之役齊里克齊佐
色勒庫爾之戰相師助庫車之圍伊柱收伊西洱之降錄功皆居最抑亦其次
也

清史稿

列傳一百四

王無黨

吳進義

譚行義

李勳

樊廷

武進陞

馬負書

范毓琦

王無黨直隸萬全人康熙五十一年武進士授藍翎侍衛累遷廣西梧州協副將貴州台拱九股苗爲亂無黨率師討定之擢左江鎮總兵九股苗復爲亂無黨馳抵古州分兵赴八寨督剿經略張廣泗檄無黨分攻台拱大台雄克之平交上等三十餘寨禽其渠巴利會收牛皮大箐乾隆元年署貴州提督從廣泗撫定上下九股諸苗從爲亂者二年眞除疏陳黔省急務請籌積貯築城垣整墩臺塘房禁掠賣人口下部議行定番州屬姑盧寨苗恃險強肆廣泗與無黨遣漢土官兵三千餘分道燬寨搜箐禽其渠老排十餘日而定上褒其妥協四年陞見賜孔雀翎六年移湖廣提督黑崗苗爲亂大學士鄂爾泰以無黨在貴州久熟苗事留使戡定乃上官八年上以湖廣軍政廢弛無黨至官未有所整

理下詔詰責十三年坐提標兵救火攘衣物兵部論無黨徇庇當奪官命詣京師引見左授湖南沅州協副將遷雲南楚姚鎮總兵內擢鑾儀使復外授福建漳州鎮總兵遷浙江提督以目疾乞罷卒諡壯愨

吳進義字子恒陝西寧朔人父開圻康熙二十七年一甲三名武進士官至雲南元江副將進義入伍從振武將軍孫思克征噶爾丹割署守備發江南借補千總累遷江南壽春鎮總兵擢江南提督疏言太湖界江浙漁船姦良難辨請照海洋例巡哨支河小汛飭兩省陸路兵巡查則聲勢聯絡姦宄斂迹有旨嘉獎久之移浙江再移福建復還浙江時有僞爲孫嘉淦疏稿語訐上進義與浙閩總督喀爾吉善以聞上令究所從來語連提督解胥吏喀爾吉善劾進義隱諱命解官聽讞進義力辨未嘗隱諱其幕客證進義已見稿浙江巡撫雅爾哈善論進義當重辟上愨其老命貫罪復以疏稿未得作僞主名令江蘇巡撫莊有恭會鞠有恭疏陳進義實未見稿浙江承審諸吏牽合附會事下軍機大臣覆訊得實上以進義無辜廢斥召來京命以提督銜署直隸宣化鎮總兵未幾

授古北口提督進義請限操演火葯增設河屯協弓兵皆允行二十三年加太子少保二十七年卒年八十四加太子太保諡壯愨進義家世多武功從祖坤貴州永北總兵嘗征四川苗及金川有功坤子開增自武舉官至浙江溫州總兵

譚行義四川三臺人康熙時以武舉授陝西西甯衛千總雍正初從軍平青海再遷河南城守營參將河東總督田文鏡劾行義送陝西軍馬疲瘦奪官上令來京引見召對稱旨賜編刻上諭貂皮香珠復原官再遷廣東高雷廉總兵總督鄂爾達檄行義將五千人協剿貴州亂苗進擊滾縱高表諸寨經略張廣泗令赴援上江攻烏溲擺弔諸險要地搜牛皮大箐獲其魁歷福建漳州湖南鎮筵諸鎮乾隆四年授廣西提督帥師會討楚粵亂苗宜山縣土蠻恃險劫掠行義與總督馬爾圖署巡撫安圖令游擊楊剛討之破白土邱索二村執其渠斬以徇忻城土縣外八堡有劇盜曰藍明星恃險焚劫行義檄副將畢映捕治明星遁入山搜捕得之有黃順者匿湖北廣東錯壤處謀爲亂貴州人黎阿蘭與

相應散旗印將起事行義詞知之督兵攻克賊巢擒斬首從七十餘事乃定柳州兵皆居草舍患火行義請發白金四千貸兵建瓦屋分三年還帑從之又有李彩者糾衆聚遷江石版村謀犯縣城行義既捕治請城北設汛尋以擅發倉穀貸於兵左授登州鎮總兵十一年遷江南提督十四年移浙江提督十六年再移福建陸路提督十八年卒諡恭愨李勳貴州鎮遠人入伍稍遷守備從征台拱九股生苗廣泗檄同剿羊弔洞里羊色諸地搜牛皮大箐勳亦在行間累遷湖廣提督緬甸亂移雲南提督疏請自普洱馳往孟良捕治亂渠召散上以其老不勝瘴癘命還普洱勳已至孟良督總兵劉德成華封等葺堡寨防要隘得召散兄猛養等勳還卒於途加太子太保諡莊毅

樊廷陝西武威人初入伍更姓名王剛從征烏蒙青海西藏積功累遷甘肅肅州鎮總兵自陳復姓名改籍四川潼川縣準噶爾犯科舍圖卡倫盜駝馬其衆二萬餘廷率副將冶大雄等將二千人禦之轉戰七晝夜與總兵張元佐等軍合殺賊無算盡還所盜時提督紀成斌護甯遠大將軍印聞上詔褒廷以寡敵

衆忠勇冠軍賜白金萬一等輕車都尉世職授陝西固原提督都督僉軍入覲請從軍命從署甯遠大將軍查郎阿出師屯南山副將軍張廣泗偵賊伏烏爾圖水檄廷將千五百人自鱗泉子進剿至哈洮遇賊奪據山梁連敗之越噶順抵鄂隆吉大坂殺賊四百禽三十六收其糧械乾隆初上從查郎阿請發甘涼諸鎮兵五千人駐哈密置總統提督以授廷廷至軍疏言烏爾克爲極西第一要隘兵出偵洮賴大坂北蘆草溝噶順溝東亂山子及烏爾圖水夜輒有火光守隘兵寡請量增又疏言哈密兵在山南煙墩溝諸地牧駝馬請分山北防兵巡護皆用其議在邊二年以病乞罷命還固原治疾遣醫往診尋卒於哈密遺疏論防邊事甚切上深愍之命查郎阿經紀其喪歸葬涼州贈都督同知諡勇毅子經文官至廣東右翼總兵經文子繼祖官湖北副將繼祖子從典請改籍湖北恩施從典子燮官湖南永州鎮總兵同治中坐事罷

武進陞山西甯鄉人其後改籍江南江甯初以張姓入伍稍遷浙江溫州鎮標守備雍正初閩浙總督滿保疏薦引見授三等侍衛屬怡親王允祥尋外授江

甯游擊累遷福建陸路提督言閩省不習騎射加意督率弓力漸增馬兵出馬收馬較前改觀高宗諭以如此方不負任使然亦不可欲速尤貴爲之以實要之以久進陞與總督喀爾吉善忤疏言喀爾吉善外似和平心實剛愎令臣密察水師提督張天駿營伍臣辭以水師非所轄督臣正言厲色必令臣密察及察知水師陋規告之督臣督臣置不問反與天駿契合臣察漳州營馬值總兵馬負書爲督臣舊部巧爲徇私令臣無地自容又疏言喀爾吉善衰憊狀上斥進陞支離狂率喀爾吉善亦劾進陞徇所屬縱兵行竊因左授江南狼山鎮總兵進陞疏謝諭曰汝無他過祇好勝多事故左授示薄懲若不知改或遂委靡一切姑息皆不可也居數月擢江南提督以老罷再起終浙江提督卒年八十餘諡良毅馬負書漢軍鑲黃旗人乾隆元年一甲一名武進士授頭等侍衛累遷福建漳州鎮總兵疏言漳州民好鬪有所謂闖棍結黨肆行土豪養爲牙爪請嚴治之上下其章喀爾吉善令體察懲治歷瓊州金門臺灣狼山諸鎮署古北口提督疏言兵習陳法無濟實用應於秋冬收穫後擇地成列爲仰攻旁擊

勢分合進退以金鼓爲節常月教場演習仍依營制得旨允行授福建陸路提督卒諡昭毅

范毓綺山西介休人范氏故巨富康熙中師征準噶爾輸米餽軍率以百二十金致一石六十年再出師毓綺兄毓麟請以家財轉饗受運值視官運三之一雍正間師出西北二路怡親王允祥薦毓綺主饗計穀多寡程道路遠近以次受值凡石米自十一兩五錢至二十五兩有差累年運米百餘萬石世宗特賜太僕寺卿銜章服同二品寇犯北路失米十三萬餘石毓綺斥私財補運凡白金百四十四萬師旣罷米轉運近地戶部接近值核銷故所受遠值責毓綺追繳凡白金二百六十二萬復出私財採葭市銅供鑄錢以償毓綺以武舉授衛千總以駝佐軍擢守備累遷直隸天津鎮總兵自河南河北移廣東潮州疏請令潮州營兵如河北例兼習長槍短棍連接棍諸藝世宗命與總督鄂彌達提督張溥商權鄂彌達等上言廣東山海交錯軍械惟鳥槍最宜次則弓箭藤牌挑刀大礮毓綺所議與廣東不甚宜上躑鄂彌達等議仍諭毓綺初至當嘉其

肯言嘉應潮陽遇颶海岸決毓綺以聞命加意撫綏乾隆初署廣東提督故事市舶至詣海關納稅或遇風未至所往地中道暫泊亦論稅如例毓綺慮民避屢稅遇風不敢泊致傾覆疏請商舟寄泊非卽地市易不徵稅上命待審察毓綺以憂歸服終授直隸正定鎮總兵湖廣總督阿爾賽請移任苗疆上不允諭以毓綺富家子弟謹慎無過苗疆事重不能勝也上巡五臺毓綺言兄毓麟子清注具羊千馬十備賞賚上却之尋以老罷卒

論曰提鎮雖專閫然受制於督撫所轄兵散處諸營汛都試肄武虛存其制耳無黨進義皆能勤其官者行義捕盜廷屢從戰皆有勞進陞斷不欲曠其職毓綺與其兄出私財助軍興幾傾其家而不悔求諸往史所未有也

清史稿

列傳一百五

阿桂

子阿迪斯 阿必達

阿桂字廣庭章佳氏初爲滿洲正藍旗人以阿桂平回部駐伊犁治事有勞改隸正白旗父大學士阿克敦自有傳阿桂乾隆三年舉人初以父廕授大理寺丞累遷吏部員外郎充軍機處章京十三年從兵部尙書班第參金川軍事訥親張廣泗以無功被罪岳鍾琪劾阿桂結張廣泗蔽訥親逮問十四年上以阿克敦年老無次子治事勤勉阿桂罪與貽誤軍事不同特旨宥之尋復官擢江西按察使召補內閣侍讀學士二十年擢內閣學士時方征準噶爾命阿桂赴烏里雅蘇台督台站逾年父喪還京旋復遣赴軍授參贊大臣命駐科布多授鑲紅旗蒙古副都統二十二年秋授工部侍郎輝特頭人舍楞約降唐喀祿以兵往會爲所襲阿桂率兵策應上嘉之賜花翎上命阿桂與策布登扎布合軍擊舍楞毋使逃入俄羅斯阿桂言得降賊謂舍楞將逃土爾扈特或不達且復回準噶爾邀之中路可禽獻上責其觀望召還京是年準部平復命赴西路與

副將軍富德追捕餘賊霍集占叛二十四年命赴霍斯庫魯克從富德進討八月逐賊至阿勒楚爾又至伊西洱庫爾淖爾回衆降霍集占走拔達克山是年回部平上以阿克蘇新附爲回部要地命阿桂駐軍綏撫二十五年移駐伊犁阿桂上言伊犁屯田阿克蘇調兵諸事上嘉其勇往命專司耕作營造務使軍士回民皆樂於從事時西域初定地方萬餘里伏莽尙衆與俄羅斯鄰上詔統兵諸大臣議咸謂沙漠遼遠牲畜凋耗難駐守阿桂疏言守邊以駐兵爲先駐兵以軍食爲要伊犁河以南海努克等處水土沃衍宜屯田請增遣回民嫻耕作者往屯增派官兵駐防協同耕種次第建置城邑預籌馬駝置台站運沿邊米赴伊犁簡各省流人嫻工藝者發備任使又奏定山川土穀諸祀典上用其議阿桂造農器督諸屯耕獲歲大豐二十六年疏言伊犁牧羣蕃息請停內地購馬駝增招葉爾羌喀什噶爾阿克蘇烏什回民詣伊犁廣屯田皆稱旨迭授內大臣工部尙書鑲藍旗漢軍都統仍駐伊犁奏瑪納斯庫爾喀喇烏蘇晶河三地屯田人授十五畝二十七年疏定約束章程建綏定安遠二城兵居民房

次第立一如內地數千里行旅宴然予騎都尉世職召還賜紫禁城騎馬命軍機處行走調正紅旗滿洲都統加太子太保二十九年命署伊犁將軍尋調署四川總督時金川土司郎卡與綽斯甲布等九土司構釁阿桂巡邊盡得郎卡狡獪怙惡狀並悉其山川形勢入奏是冬召還京三十年上南巡命留京治事烏什回賴黑木圖拉作亂詔馳赴烏什與將軍明瑞攻之賴黑木圖拉中矢死衆伯克復推額木色圖拉抗我師自三月至八月攻城不下明瑞軍其北阿桂軍其南作長圍困之絕其水道賊糧盡內訌沙布勒者擒額色木圖拉以獻烏什平上責其遲延示怯損威部議奪官命留任駐雅爾城旋復奪尙書命還伊犁助明瑞治事阿桂疏請移雅爾城於楚呼楚從之三十二年授伊犁將軍請自楚呼楚至烏爾圖布拉克設三臺以通雅爾下部行緬甸擾邊總督劉藻楊應琚先後得罪去上命明瑞率師討之至猛育糧盡戰沒大學士傅恒自請行三十三年以傅恒爲經略阿桂及阿里袞爲副將軍仍授阿桂兵部尙書雲貴總督三十四年以明德爲總督令阿桂專治軍事阿桂請由銅壁關抵蠻暮伐

木造舟俟經略至軍進攻老官屯且言軍糧不給上以爲畏怯罷副將軍改授參贊大臣九月舟成傅恒亦至分三路進傅恒出萬仞關由大金沙江西經猛拱暮魯至老官屯阿里袞率舟師循江下阿桂率蠻暮新舟出江會之先伏兵甘立寨緬人從猛曼來拒寨兵出擊沉三舟舟師噪應之緬人大潰殲其渠遂與西岸軍合老官屯守禦堅軍士多病瘴阿里袞卒於軍復授阿桂副將軍傅恒亦病上命班師而緬酋懵駿亦懲甘立寨之敗遣使議受約束乃召傅恒還命阿桂留辦善後授禮部尙書三十五年兼鑲紅旗漢軍都統命赴騰越待緬人入貢遣都司蘇爾相賚徼至老官屯緬人拘之索還土邦等三土司疏入上命罷尙書都統以內大臣留辦副將軍事三十六年疏請大舉征緬入覲陳機密上手詔詰責命奪官留軍效力是時金川酋郎卡已死其子索諾木及小金川酋澤旺子僧格桑擾邊四川總督阿爾泰征之無功上命阿桂隨副將軍尙書溫福進討十二月署四川提督克巴郎拉達木巴宗各寨三十七年二月克資哩山進克阿喀木雅松潘總兵宋元俊亦復革布什咱兩金川勢日蹙合謀

抗我師上命溫福等三路進討阿桂出西路阿喀木雅攻喇卜楚克克之奪普爾瑪寨進逼美美卡澤旺爲子謝罪索諾木亦代僧格桑請還侵地上不許時侍郎桂林代阿爾泰爲總督並領其衆至黑隴溝失利副將薛琮死之阿爾泰劾罷桂林上授阿桂參贊大臣命赴南路接勦僧格宗者小金川門戶也甲爾木山梁爲僧格宗要徑阿桂乘賊怠潛赴黑隴溝夜半大霧襲據之進逼僧格宗突入毀其碉殲賊無算上授溫福定邊將軍豐昇額阿桂俱授副將軍分道取美諾阿桂克美都喇嘛寺俯瞰美諾僧格桑遁布郎郭宗而溫福亦克西路來會進勦布郎郭宗僧格桑送孛金川而遁底木達求見父澤旺澤旺不納渡河走金川澤旺降械送京師小金川平於是議討金川金川賊巢二曰噶拉依曰勒烏圍溫福由功噶爾拉阿桂由當噶爾拉合攻噶拉依豐紳額由綽斯甲布徑攻勒烏圍復授禮部尙書三十八年正月朔冒大雪進奪當功噶爾拉諸碉而溫福至木果木索諾木誘降番叛襲軍後斷登春糧道我師潰溫福死之小金川與美諾等相繼陷阿桂悉收降番械毀碉寨分置其人章谷打箭爐斬

其桀驁者親殿軍退駐達河事聞上怒甚命發健銳火器兩營黑龍江吉林伊犁額魯特兵五千授阿桂定西將軍明亮豐伸額副將軍舒常參贊大臣整師再出十月攻下資哩用番人木塔爾策分師由中南兩路進潛軍登北山巔遂取美諾明亮等亦克僧格宗來會凡七日小金川平三十九年正月朔阿桂抵布郎郭宗人裹十日糧分三隊進轉戰以前克穆喇穆左右二山贊巴拉克山色依谷山二月克羅博瓦山烏勒圍門戶也賊退守喇穆山部將海蘭察從間道破色滿普寨繞出山後賊退守薩甲山嶺海蘭察奪其峭壁大礮諸寨奪氣同時下乘勝臨遜克爾宗僧格桑死於金川金川酋獻其尸而死守遜克爾宗十月阿桂用策先克默格爾山及凱立葉於是日爾巴當噶諸礮反在我師後遂悉平之賊退守康薩爾山時豐伸額出北路師至凱立葉望見煙火以師來會而明亮出南路阻於庚額山阿桂令移軍冒雨破宜喜與明亮軍隔河相望十一月克格魯克古丫口金川東北之賊殆盡四十年正月克康薩爾山梁二月克沿河斯莫思達寨四月克木思工噶克丫口五月克下巴木通及勒吉爾

博山梁進據得式梯復克噶爾丹寺噶郎噶等寨進攻巴占屢攻不下分兵從舍圖枉卡繞擊牽賊勢七月克昆色爾及果克多山進克拉枯寺菑則大海山梁旋克章噶八月克隆期得寨遂克烏勒圍捷聞上遣阿桂子阿必達齋紅寶石頂賜之九月克當噶克底諸寨十月克達噶木十一月克西里山雅瑪朋寨十二月克薩爾歪諸寨進據噶占四十一年正月克瑪爾古當噶碉寨五百餘遂圍噶拉依索諾木母先赴河西集餘衆大兵合圍與其子絕遂降阿桂令作書招索諾木而其頭目降者相繼索諾木乃率衆降金川平安置降番設副將同知分駐其地詔封一等誠謀英勇公進協辦大學士吏部尙書軍機處行走四年班師上幸良鄉城南行郊勞禮賜御用鞍馬還京獻俘御紫光閣行飲至禮賜紫韁四開襖袍初阿桂去雲南緬甸遣使議入貢械送京師下獄至是誅索諾木母子頭人上命釋緬使令觀譯告以故縱之歸冀以威武風動之四十二年署雲貴總督圖思德奏憎駁已死子贅角牙立輸誠納貢願歸中國人請開關通市上以事重當有重臣相度受成命阿桂往蒞五月授武英殿大學士

管理戶部兼正紅旗滿洲都統緬甸使不至遣蘇爾相等歸遂召阿桂還未幾緬甸內亂又十餘年國王孟隕具表祝上八旬聖壽定十年一貢南徼始安四十四年河決儀封蘭陽奉命往按阿桂令開郭家莊引河築攔黃壩又於下流王家莊築順黃壩蓄水勢逼溜直入引河四十五年三月隄工歲還京兼翰林院掌院學士旋命勘浙江海塘築魚鱗石塘柴塘及范公塘四十六年工成命順道勘清江陶莊河道高堰石工甘肅撒拉爾新教蘇四十三與老教仇殺戕官吏總督勒爾謹捕教首馬明心下獄同教回民二千餘夜濟洮河犯蘭州噪索明心布政使王廷贊誅明心賊愈熾上命阿桂視師時阿桂猶在工命和坤往督戰失利賊據龍尾華林諸山道險隘阿桂至設圍絕其水道進攻之賊大潰殲蘇四十三餘黨奔華林寺焚之無一降者甘肅冒賑事發命按治盡得大小官吏舞弊分贖狀讞定疏請增設倉廩廣儲糧石以濟民食秋河決河南青龍岡命自甘肅赴河南會河道總督李奉翰督塞河故事河決當決處兩端築壩漸近漸合謂之合龍十二月兩壩將合副將李榮吉謂水勢盛宜緩阿桂督

之急既合屬吏入賀榮吉獨不至召之則對使者曰爲榮吉謝相公壩不可恃不敢離也越二日果復決阿桂馳視榮吉已墮水懸千金賞救之起解御賜黑狐端罩覆之因上疏自劾請別簡大臣董其役上詔答略曰近年諸臣中能勝治河任者舍阿桂豈復有人惟當安心靜鎮別求善策四十七年奏請於下游疏引河上游築大隄並於北岸建壩迫溜南趨四十八年工始竟詣熱河行在復命仍赴工次審定章程浙江布政使盛住疏論總督陳輝祖籍王亶望家有所私命阿桂如浙江按治還又命勘江南鹽河水道又命勘河南蘭陽十二堡隄工並於戴村建閘四十九年甘肅鹽茶廳回民張阿渾據石峯堡以叛上遣福康安海蘭察等討之復命阿桂視師兩月餘破堡戮張阿渾等加一等輕車都尉世職又命督河南睢州隄工五十年舉千叟宴阿桂領班又命勘河南睢州河工並察洪澤湖清江形勢五十一年又命勘清江堤工並如浙江按倉庫虧缺勘海塘又命勘江南桃源安東河決再如浙江按治平陽知縣黃梅重徵論如律五十一年又命督塞睢州十三堡河決時臺灣民林爽文叛上命福路

安討之諮阿桂軍事阿桂疏論師當扼要害分道並進先通諸羅道廓清後康
自大甲溪進兵諭曰所見與朕略同已諭福康安奉方略睢州工竟又命勘江
南臨湖甄石隄工五十三年又命按湖北荊州水災請疏塞金洲以導水修萬
城隄以護城五十四年命再勘荊州隄工嘉慶元年高宗內禪阿桂奉冊寶再
舉千叟宴仍領班於是阿桂年八十矣疏辭領兵部二年八月卒仁宗臨其喪
贈太保祀賢良祠諡文成阿桂屢將大軍知人善任使諸將有戰績獎以數語
或賚酒食其人輒感激效死終其身臨敵夜對酒深念得策輒持酒以起且必
有所號令方溫福敗受命代將一日日欲暮率十數騎升高阜覘賊砦賊望見
擴騎數百環阜上阿桂令從騎皆下馬解衣裂懸林木乃令上馬徐下阜賊迫
阜從落日中觀旂幟疑我師衆方遣騎出偵阿桂已還軍矣師薄噶拉依索諾
木約以明日降城柵盡毀日暮諸將謁阿桂謂今日必生致索諾木不然慮有
他阿桂不答入帳臥明日索諾木自縛詣帳下阿桂謂諸將曰諸君昨日語蓋
慮索諾木他竄或且死我已得險要竄安之且能死豈至今日故吾以爲無慮

諸將皆謝服及執政尤識大體康熙中諸行省提鎮以次卽有空名坐糧雍正八年著爲例乾隆四十七年詔補實額別給養廉阿桂疏言國家經費驟加不覺其多歲支則難爲繼此新增之餉歲近三百萬二十餘年卽需七千萬請除邊省外無庸概增上不從是時帑藏盈溢其後漸至虛匱此其一端也乾隆末和坤勢漸張阿桂遇之不稍假借不與同直廬朝夕入直必離立數十武和坤就與語漫應之終不移一步阿桂內念位將相受恩遇無與比乃坐視其亂政徒以高宗春秋高不敢遽言遂未竟其志高宗圖功臣於紫光閣前後凡四舉列於前者親爲之贊定伊犁回部五十人大學士傅恒將軍兆惠班第納木扎爾副將軍策布登扎布富德薩拉爾大學士總督黃廷桂參贊大臣親王色布騰巴爾珠爾貝子扎拉豐阿郡王羅卜藏多爾濟額敏和卓尙書舒赫德阿里袞總督鄂容安侍郎明瑞阿桂三泰鄂實領隊大臣內大臣博爾奔察提督豆斌高天喜副都統端濟布護軍統領愛隆阿前鋒統領瑪瑞副都統巴圖濟爾噶爾散秩大臣齊凌扎布噶布舒郡王霍集斯貝子鄂對內大臣鄂齊爾散秩

大臣阿玉錫達什策凌副都統鄂博什溫布由屯三格侍衛奇徹布老格達克塔納薩穆坦璜綽爾圖塔瑪爾富錫爾海蘭察富紹扎奇圖阿爾丹察五十保定金川五十人將軍阿桂副將軍豐昇額明亮大學士舒赫德于敏中尙書福隆安參贊大臣親王色布騰巴爾珠爾都統海蘭察護軍統領額森特舒常領隊大臣都統奎林和隆武福康安副都統普爾普荊州將軍興兆參贊大臣提督哈國興領隊大臣提督馬彪馬全書麟副都統三保烏什哈達瑚尼爾圖珠爾格德阿爾都阿爾薩朗舒亮科瑪伊蘭保佛倫泰富興德赫布莽喀察總兵海祿敖成官達色成德欽保曹順保寧特成額烏爾納總兵敦柱侍衛額爾特托爾托保泰斐英阿柏凌達蘭泰薩爾吉岱佐領特爾惇澈副將興奎定臺灣二十人大學士阿桂和珅王杰協辦大學士福康安領侍衛內大臣海蘭察尙書福長安董誥總督李侍堯孫士毅巡撫徐嗣曾成都將軍鄂輝護軍統領舒亮普爾普提督蔡攀龍梁朝柱許世亨總兵穆克登阿張芝元普吉保散秩大臣穆塔爾定廓爾喀十五人大學士福康安阿桂和珅王杰孫士毅領侍衛內

大臣海蘭察尙書福長安董誥慶桂和琳總督惠齡護軍統領台斐英阿額勒登保副都統阿滿泰成德功稍次者列於後儒臣爲之贊惟阿桂與海蘭察四次皆前列阿桂定金川元功定臺灣首輔皆第一定廓爾喀以爵復第一讓於福康安道光三年二月宣宗命配饗太廟子阿迪斯阿必達阿迪斯初以三等侍衛坐阿桂征緬甸無功奪職發遣廣西右江鎮逾年赦復官累遷兵部侍郎襲一等公復累遷成都將軍以川西盜發逮問發遣伊犁赦歸卒阿必達初名阿彌達高宗命更名阿桂得罪奪藍翎侍衛發遣廣東雷瓊鎮赦歸復官擢二等侍衛命赴西甯祭告河神探黃河真源上命輯入河源紀略累遷工部侍郎卒阿必達子那彥寶官至成都將軍那彥成自有傳

論曰將者國之輔智信仁勇合羣策羣力治而用之是之謂大將由是道也佐天子辨章國政豈有二術哉乾隆間國軍屢出熊羆之士因事而有功然開誠布公謀定而後動負士民司命之重固無如阿桂者還領樞密決疑定計瞻言百里非同時諸大臣所能及豈不偉歟